



穀城山館詩集卷之四目錄

七言古詩

唐體樂府附

長安道

將進酒

巫山高

有所思

戰城南

朱鷺篇

輕薄篇

烏夜啼

賈客樂

大堤曲

對酒行送朱廷平可大左遷汝州別駕

行路難送可大

白馬篇送可大

明妃曲送可大

鳴鴈行寄趙澱陽年兄南粵

江南曲

關山月

行行且遊獵篇爲于子冲賦

洛陽道

采蓮曲

上雲樂

柸槃舞歌

鳳臺曲

閣試征西將軍出塞歌

館課沙堤行

題桃川圖贈鍊師張子故西苑方士也

贈鄔秀才汝翼

送業師黃東野先生左遷衛輝郡博

彈鋏歌爲鄆樊生賦

荆門歌送沈澄川太史奉使楚藩

夜郎歌送賈諫議德修奉使黔中臨問屬夷酋

長

白將軍歌爲吉軒令君賦

投筆歌送侯兄上清浪叅將

送業師鄭舒軒先生署教海寧同子冲可大二

君

聽琴篇呈李雪滬先生

匡廬山人歌寄胡少白文學

贈于子冲大叅請急南旋

壽李北山先生八十

穀城山館詩集卷之四

東阿于慎行著

門人邢侗校

門人郭應龍編

七言古詩

唐體樂府附

長安道

東出灞陵橋回望長安道  
烟花萬戶暖風輕羅綺千  
門明月曉漢家宮闕鬱峩  
堯碧閣珠樓倚絳霄丞相  
衣冠蒼玉佩將軍甲第赤  
欄橋平明內殿承顏色日

晏朝迴行紫陌夾道金羈赭汗流盈門繡轄朱塵塞  
人生得意自輝光刺謁紛紛滿路旁一笑看人回祿  
命片言酬客腐肝腸小子勝衣皆受印蒼頭結綬亦  
爲郎貔虎三千陳列第鴛鴦七十閉東廂銀牀月瑩  
流蘇帳翠幙烟浮玳瑁梁鐙前北里千金舞座上宜  
城九醞觴年去年來無旦暮春花秋月依然度歌吹  
平連長樂鐘林園直接新豐樹祇知娛樂不知憂轉  
眼榮華逐水流誰道冰山可永峙誰言天雨可重收  
曾聞上將幽鍾室曾見元公賜養牛博陸門前羅烏  
雀平津邸內走鼉鼉古來世事渾如許道上堊楊不  
解語唯有東陵舊日侯瓜田看盡青門雨

將進酒

君不見見洛陽城東桃李花暮時紅雨早時霞又不見  
瑤臺素月飛銀闕三五蟾光四五缺人生行樂不須  
愁富貴豪華電露流昔時鼎盛五侯里今時零落成  
荒丘長安貴人眼中數規名規利何太苦日中走馬  
平津第絳塵拂衣汗成雨白衣蒼狗在須臾雷公駢  
鉤震下土楊雄寂寞默守玄賈誼太息將安補青玉

案紫霞盃與君沽酒臨高臺烹龍魚鳳白日暮清歌  
妙舞香風來朝不從騏驥遊暮不從黃鵠棲浮名碌  
碌果何有天地於我如醯雞茫茫吹萬同一呷曾史  
桀跖皆電滅君今少壯復不飲坐使紅顏鏡中歇紅  
顏銷歇奈爾何華髮蕭蕭日以多直須枕藉杯中酒  
莫問浮沉海上波

巫山高

巫山高高不可極十二芙蓉入天碧楚王館前暮雨  
飛流烟凝翠濕仙衣蘭詞半吐卷衣去渺渺行雲不  
知處日高枕上聽猿聲惆悵高唐夢不成

有所思

有所思乃在蕭關道玉井蒼苔歲月深門前細路生  
春草春草如烟秋月缺路遠魂飛不可越祇聽關山  
笛裏聲登樓曠望肝腸絕東來有鳥正西飛願寄一  
書到海涯鳥辭天長去不及藏書懷袖衣帶緩

戰城南

去年戰龍城南今年戰烏丸北海門半夜風雨聲島  
嶼微茫天地黑邊營噉噉新鬼號頭臚亂落芙蓉刀

平明幕府歌鐘起白壁黃金北斗高夷奴垂鞭出海  
嶠回首遼陽馬上笑爾曹歸漢不歸胡異方飽死原  
上烏至今愁望零支道白草寒霜萬骨枯

朱鷺篇

昆明池水金堤曲朱鷺飛來春草綠紅樓紫殿度香  
風片片丹霞水上宿王孫蘇合作彈丸飛落碧空池  
水寒網絲漠漠如烟織歛翅裴回不可卽朱鷺朱鷺  
何紛紛避人引子叫入雲刻畫白頭人不識海邊笑  
殺素衣群

輕薄篇

長安九陌花初發細馬輕車看不歇五陵少年遊冶  
郎開顏發艷朝日光珠牕繡網烟如織明月樓中夜  
吹笛雙燕西飛底不知銜泥飛出鳳凰枝

烏夜啼

金陵城頭秋月深城烏夜半啼高林閨中思婦挑紅  
燭斜倚寒牕聽不足低鬟無語濕羅衣起視明星河  
漢微

賈客樂

廣陵賈子江東客大扁珂我倚江側朱樓繡箔月如  
霜醉臥壚頭小玉牀五更解船大江去鼉浪鯨風何  
處住洞庭秋水接天來五兩成林夜半開西登三峽  
立百丈灑瀨如牛不得上環環布帆欲退飛猿鳴一  
聲淚沾衣錢刀暗快狎風色歸來金多頭已白同時  
隴上飯牛子睡起烟臯夜吹笛

大堤曲

大堤春盡花成雨大堤女兒隔花語揚州估客四角  
幡暮泊蘭橈宿江渚芙蓉寶帙綠雲鬟翠簾銀缸夜  
色寒倚瑟當壚春酒盡卷帷望月曉裝殘石城一曲  
歌未足日出天空江水綠含啼送客更多愁腸斷烟  
波萬里秋

對酒行送朱廷平可大左遷汝州別駕

朱君朱君爲我楚舞我爲君歌金尊綠酒春風過天  
長道遠可奈何爾不能汎汎與鳧俱上下一朝海水  
生白波我今送爾萬里長河道歌聲一闋令人老上  
有悲鳴嗷嗷離群嘯匹之春鴻下有萋萋斷腸草斷  
腸西去思悠悠洛水齊山兩地愁平生不作兒女態



今日爲君雙涕流朱君朱君與爾登高丘望遠海茫  
茫塵世不知年秦皇漢武今安在天生豪傑必有用  
如君自是人間才縱然落魄江海上浮雲於我何有  
哉朱君朱君爾今且飲三百杯

行路難送可大

典我千金裘矣醉千鐘酒何處正愁人月落青門柳  
長跪問行子君今何所之海風五六月豈是客遊時  
北上太行坂羊腸詰曲何時返南去渡長河津梁隔  
關生風波蛟龍出遊雲雨多雷公砰訇奈若何行路  
難難未已何當與子浮滄溟一掛長風三萬里

白馬篇送可大

白馬黃金羈蹀躞溝水頭君今且莫去爲我暫淹留  
昔我束髮年與子同出入幸承明主恩並列金閨籍  
行彼長安途宛如雙飛翼自謂連行兩不離豈知一  
旦成分析我棲東海岸君去洛陽遊天津橋下水不  
盡古今愁陸機名高翻見妬賈生胡遭絳灌仇人心  
對面如山海世情交道何悠悠丈夫得意自有數豈  
能與蜉蝣翠羽楚楚爭春秋爲君笑盡一杯酒彈劍

悲歌醉未休

明妃曲送可大

妾本名家子十五顏如玉羅綺閉重閨羞道黃金屋  
君王選秀色早歲入深宮三年不召見憔悴泣春紅  
同時入宮人一一錦屏中芳顏自倚能傾國肯學他  
家買畫工祇憐寂寞深宮裏不道風塵邊塞起君王  
一顧不可留蛾眉遠嫁三千里紅頰兩行啼邊城草  
色萋今宵胡地月昨夜漢宮雞漢宮桃李春如雪此  
時絨怨辭丹闕但使君心悟畫圖不惜龍沙愁夜月

鳴鴈行寄趙潁陽年兄南粵

鳴鴈發雲中羽翮摩天舉何意長風來吹向瀟湘渚  
連行接翼不忍分忽然散落如風雨洞庭波寒木葉  
稀霜空嘹唳常苦饑迢迢故國日已非聞弦虛驚使  
我歛今復彈射將安歸不及銜泥雙燕飛金牕繡戶  
春日微一爲鳴鴈行三嘆沾人衣

江南曲

蕭蕭烟雨秋江口兩岸青旗拂細柳估客初迴錦纜  
舟妖姬正熟銀槽酒珠樓宛轉畫橋東油壁輕舟綺

蘇州山館詩集卷四  
繡中桃葉江前對明月莫愁湖上起淒風繁華莫唱  
江南曲吳宮舊草茫茫綠

關山月

隴頭流水何年別戍客辭家心欲絕橫笛寒吹塞上  
聲春閨近對關前月如花小婦翠眉低覽鏡愁生玉  
面啼十年征戍音塵斷不得雲中半紙題織成錦字  
空自嘆槭愁那到玉門西

行行且遊獵篇爲干子冲賦

漁陽九月胡雲黑使君叱撥桃花色酒酣弄轡意氣  
豪呼鷹出獵燕然側黃間欲挽倚寶刀銀鏑飛過雙  
青骹千群玄鹿大如兕排風蹠地走且號日斜勒馬  
原上立蕭條狐兔無遺迹書生自學萬人敵爲君却  
掃陰山北

洛陽道

漢宮烏啼天欲曉平明試馬東城道銀鞍玉勒五花  
驄十八承恩拜侍中春寒花滿披香殿溫室璇房夜  
開宴呼盧一擲賜錦袍百和香烟經宿散君不見咸  
陽三月花如雨卷衣淚落秦宮女

采蓮曲

芙蓉江上秋風烈采蓮少女沙棠楫紅顏耀日總疑  
花翠袖凌烟渾勝葉月高船重花欲稀漸聽花間笑  
語微停橈忽憶巴陵道悵望烟波涕滿衣

上雲樂

東廂食舉百戲作魚龍曼衍中堂落華鍾忽駐舞綴  
停更進西方上雲樂老胡家世是文康紫髯深目華  
蓋方白巾裹頭火浣細綠珠作帶韎鞞長曾從海上  
栽若木吹笙更截崑崙竹朝看阿母鬢成霜夕見安  
期顏似玉却候明時日再中謁來獻賚玉門東流沙  
暮涉三萬里碣石天開百二重辟邪師子陳成列赴  
曲聲隨簫鼓節漢苑白麟未足珍宛城寶馬空稱絕  
老胡歌舞奏仙倡爲祝黃圖日月長但願百蠻九塞  
靖烽火陛下長傾萬歲觴

杯槃舞歌

吹鸞簫考鼉鼓四座停酌看槃舞七槃宛轉一七舉  
左翻右覆勢如取九日落天星作雨晦明滅沒不可  
覩觀者疊迹色怖沮跳丸弄劍安足數夜長酒多絃

管清收繁按節作緩聲月高露下天宇平向來巧拙  
虛無形

鳳臺曲

未央宮前桃李花柳枝烟裊御陌斜貴主初臨萬年  
館小侯新試七香車香車繡幃開長樂十里天街鋪  
錦箔臺上乘鸞白管簫樓頭走馬黃金絡賜衣分得  
御袍香寶玦珊瑚佩帶長朝遊歌管金張第暮入風  
流趙李場君不見隴西老將頭白盡百戰不博通侯  
印

閣試征西將軍出塞歌

榆關九月寒風早玄霜已白邊城草虜騎朝侵敕勒  
營將軍夜出祁連道關山曉月度龍沙馬上芙蓉吐  
劍花連營畫地傳刀斗十萬軍聲靜不譁期門少年  
健如虎束髮從軍思報主畫角寒銷玉塞雲鐵衣冷  
拂金城雨援枹執鼓何雄哉笑看胡兒動地來合圍  
瀚海渾無敵轉戰臯蘭未肯迴紫騮汗血歸來後肘  
背黃金大如斗胡牀坐解月支頭割鮮笑酌葡萄酒  
酒泉亭障接烏孫輜重如山入塞門五雲闕下報天

子萬里封侯安足論

館課沙隄行

漢家宮闕五雲裏，複道連綿正相倚。建禮門前綺陌開，銅龍樓下沙隄起。沙隄迤靡屬東城，十里宮槐綠影橫。街官問吏傳呼過，隄上隄下人不行。黃麻早下平津閣，萬玉班高元宰爵。華轂遙從天上來，沙隄半自雲中落。滄海桑田事未真，人間富貴等流塵。只言避世金門客，曾見沙隄幾度新。

題桃川圖贈鍊師張子故西苑方士也

我歌桃川圖，舊識桃源客。骨清髮短雙頰紅，十年賣藥長安陌。自言本是武陵人，花落花開不記春。姓名偶被先皇識，選列仙官侍紫宸。紫宸宮閣天中起，西苑繁華如夢裡。銅盤百尺落秋空，綺幕千門照流水。祠壇隊隊羽衣群，鶴蓋霓裳擁聖君。黃金白璧年年賜，豹髓鸞膏夜夜焚。當時等輩俱光采，算袋褌衫揖上宰。曾窺阿母降瑤臺，更訪安期入東海。海上重來鬢已秋，鼎湖龍去水空流。夾城輦路多青草，別殿宮官半白頭。承恩舊侶知何處，聞逐雲中雞犬去。惟

餘野跡走風塵却憶桃花源裏住我聞此語涕沾膺  
世事從來不可憑君今莫說丹砂事松栢蕭蕭冷茂  
陵

贈鄔秀才汝翼

白頭自如新傾蓋自如故西風蕭索朔鴈號江南老  
生來何暮我聞吳楚之間多大雅布衣往往稱作者  
才情不復論三唐直薄西京接枚馬君乎君乎何壯  
哉握筆一掃傾群材淒風寒迸金石裂長濤怒激天  
地迴眼前浮沉那足數文章有真心自苦胡爲乎敝  
裘零落雙眼白一夜商歌淚如雨我爲歌一闋君爲  
盡一杯白雪誰憐楚客調黃金空築燕王臺看君落  
魄今何似古來才人亦如此莫言得意自有時人生  
所貴成名耳

送業師黃東野先生左遷衛輝郡博

漁陽城下多秋草漁陽城頭秋月曉涼風颯颯吹客  
心驅車遠下三河道三河地接太行秋倚劍悲鳴四  
紫騮滿堂擊筑吾不樂坐上胡爲賦遠遊先生落落  
閩中彥束髮牀頭開萬卷賦成盡擬似相如待詔金

門不召見明光宮裏落雙鳧握綬江城興不孤推轂  
難逢北海薦抱經却授西河徒青氈莫道成蕭索博  
士古來官不薄買駿終歸郭隗臺登龍本出孫弘閣  
垂髫舊日曾諸生負笈從遊濟北城十年不立門前  
雪望斷江南萬里程薊門烟樹今何夕白露滿庭空  
水碧一尊相對夜色寒挑盡青燈話夙昔長歌忽漫  
是離筵不盡浮雲黯遠天淇園到日應相憶萬竹寒  
聲沸百泉

彈鋏歌爲鄆樊生賦

君家閨闕高東魯亦近樊城傳舊土兩朝八座祖與  
孫後代簪纓仍接武爾亦翩翩帝里遊茱萸錦帶鸕  
鷖裘紫雲闕下彈雙鋏來向朱門傳小侯朱門修巷  
臨長道翠閣瓊樓相映好明月時聞內苑笙春風日  
暘芳隄草高堂上客號三千俠少風流獨迴然鬪雞  
南陌爭金距走馬東城揖玉鞭相逢斗酒多傾倒胡  
姬壚頭天未曉汾陽甲第貴盈門那作樵漁空自老  
薊門春盡雨茫茫汶水梁山路阻長錦衣歸向橋邊  
過不是青絲馬上郎



荆門歌送沈澄川太史奉使楚藩

荆門望望渺何許橫跨三巴控三楚高臺落日大王  
風明月空江帝子渚侍臣持節下蓬萊三楚豪遊意  
壯哉銀屏朱邸江邊峙玉檢金泥闕下開青門柳枝  
日未午胡姬壓酒當花塢聚散渾如陌上雲別離苦  
恨尊前雨驛樓官樹潞河西七十長亭路不迷贈客  
幾投青玉案當歌一聽白銅鞮南登卽向巴陵道苦  
竹香楓相映好旆指芙蓉澤畔花槎凌鸚鵡洲邊草  
蘭臺仙館白雲秋飛蓋爭隨上客遊應教非同靈運  
賦懷鄉不上仲宣樓嗟君聲名何煒煜彩筆驚人珠  
萬斛論道三年侍石渠校書乙夜開天祿長安春色  
正霏微法從翩翩滿禁扉早看方朔歸金馬莫學相  
如戀錦衣

夜郎歌送賈諫議德修奉使黔中臨問屬夷酋  
長

燕城客舍經春草落花如雪閒不掃故人忽作夜郎  
行離心溝水長安道與君追逐競高蹤翩翩矯若雙  
飛龍春風共載承明筆曉月同趨長樂鐘嗟君風度

何磊磊夙昔大名滿東海千言倚馬疾如飛賦成四  
座騰光彩一列金閨法從班朝朝鳴玉侍天顏牽裾  
折檻偶然事諫草琅琅動九關夜郎越嶠天南土萬  
里夷荒開幕府倚劍秋迴七澤雲掛帆夜度三湘雨  
天書遠向百蠻開辮髮番君夾道來嘯咤風雷震山  
嶽白日罔兩何有哉金杯紅燭月鳴杵酌酒與君對  
君語區區離合安足陳懷抱平生吾與汝春晴日觀  
轉愁予十二河山錦不如莫詫故林偏得到吾將走  
馬深崑居

白將軍歌爲吉軒令君賦

君不見關西故將五陵豪束髮從軍受六韜蓮花玉  
劍浮雲騎橫擊陰山塞月高又不見五雲樓閣春窈  
窕射策彤庭海日曉碧衣行盡長安陌玉勒銀鞍弄  
騶褭君家甲第隴雲東文武家聲霄漢通已看彩鳳  
鳴秦苑早見仙鳧出漢宮三年試政齊城宰萬樹名  
花何菴藹函關却望紫氣深姑射山中春未改將軍  
矍鑠狀如何七十猶能擊缶歌廉頗善飯英風在馬  
援凭鞍壯志多封侯萬戶吾何有庭種芳蘭門種柳

結束還徵俠少遊十千一醉新豐酒齊城東去是三  
山弱水蓬萊路不艱郎君跪乞長生藥爲駐仙人千  
歲顏吾聞黃河東來三萬里橫亘榆關天際起將軍  
世澤亦如此纍纍肘後何足比

投筆歌送侯兄上清浪叅將

昔年謁告黃山側西風送爾遊京國我來昨日入明  
光送爾南登古夜郎相逢相送何其迫踟躕溝水令  
心傷翩翩爾自佳公子丞相勲名在國史中丞蹕蹕  
本如龍汗血神駒更千里關西老將力不如魯國諸

生名大起十年不售昭王臺轅下長鳴泣未已爾時  
投筆大昂藏仗劍悲歌去故鄉兩臂常開十石弩千  
金笑入五陵場橫行直貫單于幕手縛樓煩紫塞旁  
六騾已遁一騎返雪花如席高雲黃馬首血懸月氏  
器小婦壚頭索酒嘗赤囊一日奏闕下錦鞞飛塵朝  
建章三十男兒好身手腰懸兩綬黃金璫旄頭已落  
胡天久郅支呼韓同稽首不聞天子獵長楊却召將  
軍屯細柳西南未罷伏波軍都護金章大如斗生年  
自有封侯骨彈鋏長歌勸君酒長歌未已涕沾裳客

子浮雲各一方兩甥牽裾啼不去一雙白璧吐精光  
大者日受三四卷小者學語聲琅琅顧我猶多離別  
嘆憐君不作兒女腸吁嗟乎桂水橫烟不可迫流入  
牂牁天地坼湘潭七十五長亭羨爾今爲萬里客旌  
節遙連銅柱陰樓船直壓鯨波白諸部蕃王伏道周  
千群將吏喧江澤玄猿暝嘯跼鳶驚正使豪遊壯心  
魄春江瑤草綠可折何當寄我長安陌

送業師鄭舒軒先生署教海寧同子冲可大二

君

薊門四月楊花白丹鳳城南送行客兩生擊筑酒欲  
闌先生默默不盡歡我今爲歌行路難憶昔振翮閩  
海濱才名踔絕無與倫腹中萬卷已成筭筆底千言  
若有神數奇不逢得意薦賦成誰念馬卿貧十年漢  
闕泥穿履幾度燕城桂作薪道傍明珠真按劍櫪上  
驂騮空絕塵長歌投袂出門去江上聊開絳帳春絳  
帳青氊殊不惡東南山水堪遊樂千峰夕翠入講堂  
一枕夜潮侵郡郭東風桃李色方深秋雨芙蓉顏自  
若天生豪儁豈無心不合先生長落拓君不見會稽

寒士西入秦公車不收小吏嗔偶然懷中探尺綬黃  
金繫肘意氣新又不見新豐市中貰酒客寒賤時逢  
里媪謫一日忽承門殿宣青驄蹀躞生顏色人生得  
意自有時世事浮沉那可知還看獨對彤庭問接迹  
夔龍集鳳池

聽琴篇呈李雪滬先生

雨鳴瀟瀟風滿壁虛堂孤坐春草夕何來兩客登我  
堂坐索瑤琴鼓前席吾家焦尾舊無絃世路逢人不  
解傳丈人錦囊出綠綺爲我揮手松風前宮聲一曲

試瀛洲文物翩翩禁苑遊人間帝子銅龍館海上仙  
人絳玉樓倏忽涼飈飄四屋新聲轉作瀟湘曲沙清  
石碧江水寒月明叫入汀洲宿絃悲調急聲轉微滿  
堂擊節淚沾衣幽蘭白雪何要眇此意世人知者稀  
丈人自是賢豪客橫琴呼酒雙眼白借我朱絃三尺  
強試理清商入蕭索

匡廬山人歌寄胡少白文學

廬山之高高入天孤峰秀出真青蓮峰懸石鏡何年  
影照盡彭湖三萬頃平開雙闕赤霞浮翠嶂丹崖萬

木秋飛濤倒瀉銀河水灑入長江九派流青山亦不  
摧流水亦不絕謝公行處空雲烟東林舊跡莓苔滅  
豫章胡生才且雄匣中玉劍雙飛龍拂衣欲出人間  
世走臥匡廬第一峰香爐雲氣飄山閣明滅千巖與  
萬壑雨急朝聞嶺上猿月寒夜聽江臯鶴有時結束  
帝城游俠骨常輕萬戶侯上書北闕不待報笑臥胡  
姬舊酒樓鑪頭日高金管歇楊花茫茫春雨雪此時  
彈劍却歸來脫帽長歌舞秋月胡生胡生無與倫心  
雄萬夫步絕塵英賢古乃起屠釣何況儒術逢昌辰  
彭蠡爲君腹瀑布爲君口俯瞰洞庭波吹作一杯酒  
但欲澆爾胸中萬古之壘塊風塵蹴躡吾何有胡生  
胡生何時與爾同上匡廬巔足躡星虹禮南斗

贈于子冲大叅請急南旋

長安城頭秋雨繁長安城下雙朱轡去年忽向洛陽  
道今年却入長安門誰道分司非達宦誰言朝請不  
承恩行邊慣試胡名馬奉璧還稱漢大藩憶昨匈奴  
入邊塞隴坂以西殺氣昏右方王將旃廬蒲北地烟  
塵士女奔元臣廟略馳三殿上將戎軒歷五原青海

幾經傳尺檄玉關依舊有遊魂翻令蠻府提鋒銳欲  
掃胡沙靜塞垣謝公談笑亦何易賈生流涕亦太煩  
競說請纓臨瀚海爭言倚劍出崑崙爾曹落落不入  
眼此事悠悠誰與論我今但欲拂衣去斗酒悲歌意  
氣存看君四十頭未白勉加餐食無多言

壽李北山先生八十

君不見扶桑之下一杯水一峰突出三千里其北有  
濟西有濮當代詞壇宗二李濟南修文地府深濮陽  
垂老臥空林同時已抱千秋恨異調俱稱大雅音江  
淮當日嗟流落尚墜先朝官不薄雙袖天風逐鳥還  
一竿秋水知魚樂至人遺形在杜機如翁達生識者  
稀不從北闕懷簪紱不向西山采蕨薇安期大藥欺  
人久石家金谷誰能守有田但種東陵瓜有錢但買  
宜城酒只今號作北山人素髮丹顏八十春躡屐常  
閑青玉杖呼盧時側紫綸巾半酣擊缶耳稍熱笑擁  
如花歌未歇洛陽七貴眼中塵長安五陵原上月天  
道有盈日有虛得名得壽福已餘璇閨况繼中郎業  
金匱還傳太史書中郎太史亦爾爾君家柱下差足

擬請爲小著五千文藏在白雲封中石間底

穀城山館詩集卷之五目錄

七言古詩

商丘沈封君畫竹歌

壽臨邑邢封君七十長歌

代作朱憲使雙壽長歌

寄送賈石葵大卿之任南都

岱西山人歌壽何吏部敬菴

大伾山亭圖歌爲朱令君賦

桃花嶺圖歌壽太宰楊夢山先生



多兔行爲于子冲賦

武定侯墓歌

雙林寺歌

燕子磯歌呈李棠軒宮諭

獵兔行

賣珠行

雙桂行壽宜興蔣郡丞

招山人歌

亭山洞歌上周師七十生辰

甲午五月朱可大自江右來訪相見喜極對酒

放歌

雪中登樓看山歌

雪後登樓看山歌

雪中菊花小歌

冬日送方胥成北遊臨邑訪邢子愿侍御一首

遊蜀山湖歌示任城王甥季輔

九華山歌送施幼淳省元南還青陽省觀

歲暮送汪山人敬仲南還

平倭奏捷歌

射覆謠戲作

日觀峰歌

泉林歌

嶧山歌

前贈李本寧歌

後贈李本寧歌

五大夫松歌為劉博士元陽賦

瀛海仙人歌為任丘劉翁雙壽賦

壽封君邢翁九十長歌

漁陽老將行為郭總戎建安賦

夜雨呈候吳郎

吳郎歌送翁晉北遊京師

穀城山館詩集卷之五目錄 終

穀城山館詩集卷之五

東阿于慎行著

門人邢侗校

門人郭應龍編

七言古詩

商丘沈封君畫竹歌

梁王修竹不可識千秋草合平臺迹平臺主人墨君

友掃出檀欒一千尺醉瀋淋漓幅素看枝枝蒨翠若

可餐筆端乍覺烟雲繞堂上時驚風雨寒寒聲撼瑟

生綃起如在湘江秋色裏湖州以後稱太常此幅神  
真良足擬主人種竹舊成林千里提封自作陰蟠根  
出地成龍骨勁節凌霄引鳳吟高堂日遠悲風木手  
澤淒涼餘半幅他日尚書閣上圖應寫平臺萬竿綠  
壽臨邑邢封君七十長歌

邢翁濟北之名族世代門庭羅繡轂長公諫草青蒲  
伏群從咸登天府錄翁獨倏然在巖谷芝房蘿壁薜  
荔服牛角掛經眠抱犢學儒不干五斗祿種田往往  
皆成玉瑤環瑜珥多如簇一枝炯炯先出犢名都十  
五不敢贖天風吹作華林木走馬春城十二街雕龍  
翠殿三千牘少年出宰稱民牧召入文昌錦被襪白  
簡綈囊臨仗讀雲夢汪洋舟萬斛長風直下千里速  
姓名已在金甌覆方底詔函馳半幅玉繩蘭檢何燁  
煜翁冠柱後衣錦穀行年七十方瞳綠出門柴車聲  
輾轉季方持杖元方僕齊眉仙姥膺多福閩苑春開  
阿母桃渭川日長封君竹山中八月酒新熟玉盤琥  
珀四座馥松枝自煑石溪藪珠履滿堂綺障促千金  
稱壽起相屬參差玉管間琴筑主人浮白自捧腹生

事惟餘陶令杯年華不問君平卜我家鄉邑不朝宿  
郎君舊誼敦羔鷺蹇予抱拙長碌碌彈鋏歸來頭不  
沐仙閭東望地可縮緘詞且效如川祝

代作朱憲使雙壽長歌

嶽岑大伾山西遮黎陽口白馬遙盤瓠子隄黃河如  
帶東南走東南萬里入蓬瀛轂轉雷奔大壑驚長淮  
一瀉不知歲至今惟見山崢嶸山上丹厓含翠谷別  
有日月非塵俗問言誰向此中隱西臺使君茅作屋  
使君早日客長安襍被香分畫省蘭兵符一領遼海

震戎軒再駕朔漠寒閒心舊愛春山蕨忽解緋衫辭  
帝闕黎陽一臥幾經年醉弄大伾山上月山月沉沉  
吐玉樓綠蘿飛花碧草秋有時更涉滄洲趣釣艇煙  
簑對白頭松間鼓琴俯流水猿鶴夜聲清心耳少年  
記作金閨遊一經又見金閨起珠袍錦帶開舊篋走  
馬曲江春色裏只今花樹滿河陽亦有槐陰如市里  
使君年歲七十強紅顏玉骨何昂藏郎君自獻南山  
曲戲取宮袍作舞裳齊眉玉案雙尊酒矐然又覩西  
王母雕盤綺食羅秋堂鳳簫象管無不有仙家縹緲

六鰲峰五城樓臺春氣濃大任如塊河如一杯水使  
君笑挾兩茅龍

寄送賈石葵大卿之任南都

昨夜南山射獵歸松窓醉臥星露微五更烏啼窓月  
白酒醒夢見長安客平明廐吏來相聞爲道春帆駐  
浦雲春帆信宿不知處建業澄江杳然去緘書送君  
江水長此時脉脉空斷腸

岱西山人歌壽何吏部敬菴

石不見岱宗之山海上海上起雲霞沃宿三千里七十二  
峰峰插天西支半落清河水山川回合勢連綿靈氣  
應鍾不世賢大名誰者齊北斗岱西山人行地僊山  
人舊隱雙龍闕左省含香陪上列共道詩名水部傳  
更聞啟事山公絕一時流品入陶甄簡要清通世所  
珍三十朱輪行寶陌衣香風動洛陽塵素心忽憶棲  
巖谷解組歸來雙鬢綠玉樹多從院宇生蘭房近傍  
煙雲築山人條條六十餘顏顏綽約玉不如載酒時  
遊廣里月垂竿閒釣錦川魚石間有伴殮瑤草玉几  
金牀春色曉人間已自有蓬瀛何人更說蓬瀛好爲

翁亢節歌欲長瓊卮起壽春茫茫泰山若礪海水竭  
大年不凋齊日月

大伾山亭圖歌爲朱令君賦

誰持一幅綃掃作千林碧竒峰峯嶽浮煙空秀色橫  
分白馬跡山下草堂瞰古城百花潭水飛春英長楊  
翠栢蔽雲日靜聽似聞風雨聲亦有高臺臨灌莽岩  
巖百尺浮雲上何人月夜舒長嘯一聲遙和竹林響  
臺下悠悠河水來亂帆東去接天迴青山一片明湖  
裏翠黛光搖寶鏡開春風滿巖杏花裂光中乍見輕  
烟滅絕如赤城霞皎若天山雪修竹檀欒碧萬竿清  
風瑟瑟動庭闌了然瀟湘色對此心神寒西北一畝  
丘厥形如負局僊人對奕揮素手華山幾更春草綠  
我披此圖開心顏一時坐我煙霞間恍如身到輞川  
曲目中已自無塵寰又似桃花源裏去碧流紅雨不  
知處黎陽僊翁聖代英欲臥滄浪絕世名一朝解綬  
謝天子杳然自寫丹青裏有子重看上苑花河陽萬  
樹還相似仙翁可望不可親繪爲此圖傳世人真遊  
莫訝人間少方丈蓬萊別有春

桃花嶺圖歌壽太宰楊夢山先生

長安三月烟如織上苑桃花看不極主人舊是武陵人  
 別有春林千樹色千樹萬樹玉嶺賒爛熳風前十  
 里花細纈半含僊掌露繁枝齊吐赤城霞主人數椽  
 築洞口手植城堤幾十畝笛裏香分畫閣梅樓頭艷  
 拂金隄柳花間漉酒醉朱顏石几松牀自閉關不遣  
 紅塵來陌上惟容流水到人間只道林中聊可住芳  
 菲又滿咸陽路掃盡玄都觀裏泥栽成濯錦江頭樹  
 還將幅寫花源半染山光半水痕拂拭自疑真境  
 近不知春色在公門君不見度索山前花落晚千年  
 一結條支卯東方先生太苦饑噉餘半核如金椀又  
 不見僊人子晉遊五城白鶴朝驂海上行緱山瞥見  
 花成雨沉醉吹殘月夜笙主人亦住三山島瑤池僊  
 種分來早花開幾度笙幾曲日上扶桑春未老

炙兔行爲于子冲賦

漁陽大使齊大俠行邊數奏甘泉捷千金飽士士欲  
 死領向狐奴山下獵黃榆九月號北風雙鞬怒馬如  
 盤空弓影向天毛羽落弦聲撒地霜草紅綠眼胡兒

馬前走血懸兩兔鏃貫首傳火無煩玉鼎調擘肩未  
假鸞刀剖鴟夷吐酒復不住月氏漆器在左手酒酣  
握槊還大叫笑謂魯生爾能否沙頭月出胡天黑枕  
藉相看頭不憤平生肝膽向誰傾說著世人雙眼白  
羽獵虛隨卜祝群詞人亦自樹功勳試問隴西李都  
尉雄材肯數霍將軍

武定侯墓歌

長安城西銷客魂故侯墓前雙石門空梁無風蟪蛄  
掛高臺不夜鼯鼠奔行歌牧豎上隴首守冢老兵眠  
樹根道傍徙倚長歎息千古此意誰與論當時貴寵  
真無匹勢倚青天迴白日驂乘親陪別苑遊行香日  
侍齋宮直元公鐵券大國封都護金章新樣刻玉鞭  
蹀躞內廐馬雕盤絡繹尚方食權相交驩亦掃門徹  
侯受酒咸避席此時意氣薄青雲睇笑看人寵辱分  
負郭園池田太尉重城甲第霍將軍求僊偏訪燒鉛  
客亡命多歸帶劍群曲閣重樓春自駐繁弦急管日  
初曛自言富貴無銷歇爭見桑田海亦竭未央宮前  
請室開咸陽道上車塵絕開門行馬臥莓苔舊館學



恩藏雨雪只今尺土閉空原  
歲歲春啼杜宇血吁嗟  
嗟世皇二寵傾朝廷前有武定後咸寧  
福過俱爲萬人指法行再見  
七廟靈人間榮悴咸可數古來  
金谷與郿塢前車已卻後車馳  
請君但看北邙土

雙林寺歌

道旁佛宮誰者築珠樓寶殿橫  
山麓僧徒指點爲予說此寺方成  
主人逐憶昨十載氣薰天吐納日月揮  
雲煙外廷稍引三公勢內禁親操六璽權  
出入鈞陳留筦鑰笑談甲觀走金蟬  
建寺平侵貴主第施僧直請大官錢  
輸來多寶貝堆成塔輦盡黃金布作田  
法宮梵宇何連曼勝地名區看不斷  
墓上林園學九陵祠前樓閣成雙觀  
落成牛酒國親供建醮香花天女獻  
吁嗟此寺猷渺小赤刀已欲盈千萬我  
皇神威符世祖距脫大奸俯地取郭家  
金穴入水衡鄧氏銅山歸少府廬兒解  
玉乞街衢宅婦懷簪隨平虜惟餘此寺  
在郊原虹梁綺構誰爲主珠網空懸  
梵鐸風青苔自銷瑤琅雨盛衰轉盼那  
不有幾年翻覆看如許君不見江陵城  
頭土三尺若教餒鬼不來食一代賢豪

此謂何爾全首領恩亦極

燕子磯歌呈李棠軒宮諭

大江西來萬里白建業青山兩岸劃山根片石鑿不  
斷斗入江流數千尺我來掃石上高空直躡忽悅開  
鴻濛回濤細嚙鴛鴦嶺懸厓倒瞰鼃鼃宮魂搖骨慄  
不得語銜杯邈望蒹葭渚蕭蕭木葉滿江流却是千  
帆萬帆雨雨餘返照江水紅赤城吐色江水中須臾  
海月東山出睡龍欲動金波溢水晶爲盤玉鏡開秋  
光寒瀉玻璃臺客懷跌宕不可奈散髮呼酒天風來  
西望采石若可挈長江之水亦應裂君家供奉去幾  
時不見今時江上月

獵兔歌

南山獵兔如獵虎萬騎合圍晝伐鼓壯士齊關十石  
弧王孫自撥千鈞弩兔走入窟窟草平長林落日謹  
人聲銛戟利劍不得刺汗流跼足空屏營君不見西  
山老翁手握矢臂解一鶻狡兔死

賣珠行

長安有賣珠老嫗故侯侍兒也  
能道興衰憮然有感作賣珠行

賣珠老婦髮半白提筐日走宮城陌徧謁朱門不得

休斜倚道傍長歎息自言本是綠珠儔夫壻先朝萬  
戶侯錦衣夜直銅龍闕畫棟朝開碧玉樓爾時秀色  
新承選二八娉婷集內館小閣微風倚翠屏閒房落  
月調金管羅衣寶曆不勝春十斛明珠掌上新只言  
華屋長如海不道滄溟亦作塵當時世事一朝變郿  
塢黃金實內殿劍履三千帳下空鴛鴦七十池邊散  
前年曾向舊門過新主承恩驟玉珂今年又望門前  
道行馬半殘生綠艸繁華憔悴看如昨覆雨翻雲何  
閃爍橋上年年閱水流宮前歲歲看花落我聞此語  
涕沾裳世事悠悠不可量祇應漢代麒麟閣千古名  
垂日月光

雙桂行壽宜興蔣郡丞

堂前雙桂樹堂上雙樽酒太湖一曲住者誰淮南秋  
色落君手使君瀟灑豪且賢東方千騎何翩翩一日  
上書拋紫綬走種陽羨山間田山田種秫妝不薄荆  
溪如畫堪行樂桂花已見湖上開桂子還聞月中落  
月中清影碧天秋花下斑衣對白頭陶令歸來渾是  
醉徐卿老去百無憂不見玄都觀裏桃不見灞陵橋

蘇東坡詩集卷五  
十  
畔柳桃花吹作素衣塵柳色歌殘行客口誰能向桂  
花樹下日陶然萬斛天香近酒邊燕山五枝君不羨  
蔣家三徑益可傳

招山人歌

城中山人常苦多中山人常苦少我來杖策入山  
中山人門外迹如掃聞道長安方大索髡鉗赭盡荷  
衣色今朝司隸獄中書昨日平津座上客大國并容  
何事無防川防口無乃渝山人有山歸亦得慎莫出  
走越與胡

亭山洞歌上周師七十生辰

岱宗西來未了青結作秀山山似亭亭切石洞何窈  
窕千峰萬峰羅作屏山翁少時隱山麓數椽桃花源  
上屋鵝冠凭几暮雲生牛角掛經春雨足偶然隨牒  
入燕城博士驚傳墨綬榮赤縣郎官原應宿蘭臺循  
吏早書名人間月旦吾何有那能折腰爲五斗拋却  
河陽縣裏花歸來彭澤門前柳山中回首隔風塵綠  
髮方瞳白袷巾煙霞半結遊仙侶弧矢還逢獻壽辰  
此時涼颼入戶牖華軒松桂參差茂有孫能采澤宮

蘇坡山舍詩集 卷五  
芹有兒能致宜城酒銀河耿耿月上鈎座客誰者飛  
觥籌同遊門巷多蒼蘚舊學生徒已白頭請翁拍浮  
莫辭滿人生七十古亦鮮試探洞裏玉函書海水何  
時復清淺

甲午五月朱可大自江右來訪相見喜極對酒  
放歌

別君春花落思君春鳥啼春風吹遠夢夜夜到湖西  
只言尺素迷江樹不道隔年卽相遇元方執御季常  
隨德星應卜賢人聚攬衣出迎雨滿衣秉燭相看暑  
氣微炎天命駕三千里如此交情古亦稀笑殺山陰  
一夜舟笑殺平原十日酒把杯脫帽雙眼白放歌大  
叫無不有與君譬如雙吳鈎神情會合自有由與君  
譬如雙飛燕差池羽翼時相見莫將逐客當沉淪自  
是江湖合有人試觀青海管中月試望長安陌上塵  
羨君紅顏髮盈幘我已如霜鏡中白回頭三五少年  
時半百光陰如過客赤繩繫日那得還長鯨吸海幾  
時乾燈前起舞勸君酒何處含情可盡歡  
雪中登樓看山歌

月中看山不辨色雪中看山不辨影闌前九疊錦屏  
張一時幻作虛無境蒼茫顯氣萬里通輕瓊冷絮飄  
鴻濛閭浮幾許還遭切色界由來總是空憶昨築樓  
對城缺本為看山亦看雪那今有雪却無山倚樓滿  
目成寥泐山亦非真無雪亦非常有自顧夢覺身至  
境誰為偶此時欲說已忘言拍闌且盡杯中酒

雪後登樓看山歌

昨朝飛雪滿大荒登樓四顧天茫茫今朝登樓禁不  
得吾與青山頭並白筠牀呼酒晶宇開瑤華積作中  
天臺對山遙勸一杯酒平生與君為素友君今頭白  
青有時奈何吾鬢真成絲

雪中菊花小歌

去年九月雪雨集菊花吐向雪中泣今年十月菊始  
開雪花又落黃金罌繁華何意同蕭瑟冷蕊疎枝一  
半白羅綺三千夢早春却將鉛粉妝佳色素影關山  
夜欲流寒香寂寞楚天秋不知陶令吟時醉正是袁  
安臥處愁籬邊吾亦憐吾友苦節貞心成素首試看  
東園桃李花霜前零落今何有

冬日送方胥成北遊臨邑訪邢子愿侍御一首  
黃石山頭雪未晴黃石山前送客行天寒歲暮白日  
駛北風獵獵吹冠纓看君殊少風塵色擊劍長歌雙  
眼白少年曾慕五陵豪老去猶爲萬里客只今躡屩  
遠行遊湖海茫茫路阻修舉世何人重詞賦布衣無  
策干王侯山中蕭條鮮所有解衣衣君勸君酒平生  
肝膽向誰盡但說邢公不離口邢公好士無與倫于  
金散盡家苦貧此時無忌還留趙何客馮驩可入秦  
君今又向犁丘去馬首殘陽明遠樹山頭望君酒欲  
醒相思併在君行處

遊蜀山湖歌示任城王甥季輔

昔聞鉅澤湖潏沔三百里自從中作宋公渠兩岸長  
虹夾汶濟我家湖北纜扁舟住近滄浪不解遊王郎  
亦住湖南曲攜我來探水國秋叩舷湖口渺然入洲  
渚縈回望不極荷芰殘花棹底分鷗鳧亂影帆前失  
波心宛在一丘懸直上蒼茫盡水天萬頃泓渟沉碧  
落千林黯淡入寒烟蕭然似欲來風雨感慨愁心弔  
千古秦皇片石有孤峰魯國荒臺無舊土玉甃春酒

欲盡無沉醉煙波興未孤西風不過山陰道枉向君  
王乞鏡湖

九華山歌送施幼淳省元南還青陽省觀

九峰名九子幻作九蓮花去天不知尺有幾晴空片  
片飛丹霞南宮才子江東客筆帶九華峰頂色學書  
欲作萬人敵一日聲名傾上國青春謁帝入神京黃  
石尋師駐穀城經術遠宗樞太傅門牆半列魯諸生  
忽登泰岱看鄉陌望見江頭雲氣白愁心一夜渡淮  
陽不為蓴鱸秋興迫千里寧親願不違西風蕭瑟送

將歸尊前落木渾成雨馬上微霜欲點衣為君長歌  
勸君酒便是別離未應久去日聊隨朔鴈飛來時莫  
在春鴻後玉樹青熒上苑栽 君王正憶子虛材好  
將九朶芙蓉露瀉向僊人掌上開

歲暮送汪山人敬仲南還

寒風颯颯愁雲繁江南浮客來到門手出瑤華八百  
片雪花錯落飛瓊軒自言落魄無何有湖海豪遊成  
皓首竟陵學士座上賓新都司馬社中友燕南作客  
歲將闌彈鋏長歌道路難知公當代論風雅曾向人



家卷裏看蓬門舊日不迎客爲君拂拭凝塵席談詩  
靜夜一炬紅呼酒高齋雙眼白送君南去及新春殘  
雪初消路少塵行到石城應早渡隔江桃葉喚歸人

平倭奏捷歌

去年都護大徵兵平壤島寇皆掃平今年司馬通和  
議蓋海鯨鯢不可制魚服十萬篋狂瀾千里腥風塞  
月寒不見降書來日窟空令獵火照辰韓吾皇按  
劍赫威怒獨運神謨懲往誤早傳制府鑿凶門更詔  
中丞開武庫材官負弩盡從征忼慨辭家志不平殺

氣千尋飛泃水軍聲一夜度龍城士馬驂驪誰復數  
青海原頭晝伐鼓轉旆橫捎樂浪雲洗兵半染夫餘  
土陸營三路勢已奔水管大隊赤雲屯弓刀感沸紋  
犀裂戈甲搶攘日月昏小酋面縛大酋死屬國君臣  
歌燕喜羽書昨夜自東來直入甘泉報天子論功  
大發水衡財碣石關門日夜開符節星馳玄菟塞金  
縉山累白龍堆十年餽師三百萬今日方聞博一戰  
明王守禦在四夷屬國君臣爾莫玩

射覆謠戲作

郭舍人東方朔來前射覆相爲樂謂此金盃中有何  
一蠕蟲不是蜥蜴亦非守宮中者賜帛不中城旦春  
舍人東方相顧愕哈此胡爲來哉謂之爲龍不能變  
化與雲雷謂之爲蛇又不能委蛇蒲伏與世諧此何  
物也陛下幸發視必是一蝸牛身似有所負外又無  
所求不肯濡足惟願藏頭循墻而走面壁而修鐘鼓  
不能享鼎鑊不能謀左角大勝右角大敗未嘗知喜  
未嘗知憂蘧廬爲天地混沌爲春秋其覺如寐其生  
若休此有巢氏之喬無腸子之儔與聖人拊掌笑是  
物安足收放之汗漬中使從蛭蝻遊

日觀峰歌

岱嶽峰頭一片石天光杳杳連空碧我來夜掃石上  
雲未明看見海中日日出海東幾千里茫茫不辨雲  
與水天雞啁啾海上啼東方霞氣半邊紫忽然瀲灩  
琉璃丹一泓捧出赤玉盤長繩斜挽不得上半時方  
到扶桑端扶桑枝葉成五色海水明滅一線白日斂  
雲氣如連山日中欲識鮫人國平明日高海水乾滿  
天翕絕紅氣團三山金闕流安在六鰲背骨秋霜寒

憶昔秦帝東封年欲浮白浪遊靈仙驅石作橋不可  
涉金支翠羽空西旋幾時得見海中出日三千丈脫  
屣妻子如浮煙眼前朱生信豪士側帽大叫石上眠  
我亦欲取巨石填東海揮戈且止羲和鞭六龍不停  
日如矢仰天鳴鳴酒熱耳

泉林歌

雷澤萬頃波澎渤如萬馬陪尾鎮之不得溢醜爲靈  
瀆出其下洞門噴薄瀉飛泉泝珠迸玉聲潺湲天山  
雪花四月落片片吹上春衣寒清流可漱復可枕拍  
浮大白相對飲潭中石子成五已熒熒細濯巴江錦  
行盡回溪地轉偏疑是鏡湖春水旋深林蔽虧不見  
日但聞雜樹多鳴蟬樹裏泉聲百道重木根詰曲盤  
虬龍解衣羅坐汎流羽天光水色何溶溶遠峰隱見  
多明滅殘霞飛丹手可掇此時林壑暝色來呼酒彈  
琴望雲月月上青山醉若何臨流垂手挹素波且歌  
白石吟淥水紅塵萬事空蹉跎旭日高林送客子清  
風四面松聲起市橋一出到入世武陵桃花空流水

嶧山歌

岱宗海上來西塞中條路東南數峰青未了凌波欲  
涉長河去似斷不斷走勢迴結作芙蓉掌上開青冥  
浩蕩何年裂平地湧出金銀臺名山固多奇此山奇  
欲絕纍纍萬古石豁訝成竇穴落星不到地累丸不  
到天懸圃亦已碎群玉亦已顛金華牧兒何婉變一  
入紫煙不復返世人誰者叱群羊坐看蹄角生苔蘚  
人行石中何盤珊十步九折穿嵌巖顧見雜花開綺  
繡又聞淙淙泉水聲鳴環千峰真密萬壑逼日光時  
向天窓滴深林已盡鳥不鳴攀緣猶訪白雲迹白雲  
在天何時還洞門石扇開重關五花峰頭一騁目飄  
如乘虹駕鶴飛出天地間但聞長風颯颯萬里至使  
我四顧清心顏君不見滄海桑田年歲改秦皇片石  
今安在萬騎千乘化作灰河聲依舊東流海沉吟此  
事思欲飛擊節高歌淚滿衣空憐世上浮沉子白首  
紅顏何所歸

前贈李本寧歌

一別十五年再別十二春人生百歲苦不滿可堪幾  
作別離人前年君入蜀爲李醉歌爲陳哭酒挹玉華

山色青淚灑嘉陵江水綠去年君入越曾訊朱公訪  
禹穴邀歡又作湖上吟沈侯細腰可已折今年君向  
燕京遊千騎朱衣唱八騶道旁忽問魯狂叟半夜停  
車南陌頭我病伏牀君坐膝呼兒出酒陳曲室相看  
如夢燭影殘屈指良遊話夙昔我年多君兩歲強君  
頭如漆我如霜浮沉聚散不盈眚回首萬事空茫茫  
北風吹雪角曉寒車帷欲裂嘶馬酸莫言歲晏別離  
苦更有時危道路難知君詞賦滿人口六符鼎足多  
故友君王儻復問同時舊日歲星人識否

後贈李本寧歌

李君李君汝今坎壈何甚哉七命藩臣二十載朝天  
又奉除書迴憶昔蓬萊開內院翩翩二九凌霄漢大  
者爲相小乃卿君乎鍛羽來何晏當代詞場論作者  
君及江東兩司馬誤殺人間白眼兒輕言侍從無風  
雅一去承明閱歲年秦梁蜀越多遘延道高不容豈  
有以異哉造物操微權我聞柱下之喬多才子白也  
飄零賀折死今日得君而三矣君今不夭復不賤又  
無留滯安有此李君李君爲我楚舞我爲君歌歲云

暮矣將如何天生豪雋必有用如君不信長蹉跎涇  
水一斗泥化爲一斗穀清者受其名濁者食其福翹  
翹常不足碌碌常有餘人者歆其實天者寶其虛請  
君還我凌雲筆我還君家祿萬石

五大夫松歌爲劉博士元陽賦

爵名五大夫其數不必五何知非二松屑屑爲之補  
二松五松俱莫論秦人已沒沙丘魂金椎馳道迹如  
掃此中惟有松枝存我觀此松顏色古榦如虬龍質  
如土鸞棲鶴舞幾千秋猶憶當年巖畔雨自有此山  
卽有松百木之長五嶽宗秋聲不斷天門路海氣長  
懸日觀峰亦不爲封榮亦不因封辱興亡閱盡總無  
情何況區區小除日濟北劉生達者流題詩舊向松  
間遊歲寒豈欲聯三友道遠還因寄四愁君爲博士  
掛冠早松號大夫今欲老浮名夢幻兩茫茫不須苦  
作秦松考

瀛海僊人歌爲任丘劉翁雙壽賦

君不見碣石高懸海上臺九河之水崑崙來一人淮  
陽五百載地靈猶向瀛州開瀛州雲氣何超忽北拱

漁陽連漢闕赤畿總號帝王州瑤堂別有神僊窟僊  
人碧髮更方瞳天姥霓衣出閬風臺上時騎雙彩鳳  
墟邊共跨兩茅龍當年自種藍田璧瑤草琳華堂下  
植學士絲綸接上台中丞節鉞通南極寧親暫許帝  
師旋幾道封函降自天上食分將僊禁酒舞衣攜得  
御爐煙七十已稀况八九如此齊眉古未有蓬萊謾  
道棗如瓜度索虛傳桃似斗嗟乎僊人誰與儔瀛州  
平地是瀛洲從今歲月真多少海水還成淺碧流

壽封君那又知九十長歌

翁年七十八十時我曾兩度爲祝辭今翁筭十復過  
九我辭三祝翁許否濟南古有九十人轅生伏生席  
上珍轅生爲郎官不進伏生授女口不真翁今有官  
復有子方瞳綠髮身著紫江南辭客久停毫惆悵山  
東邢柱史片紙真同片玉看雞林傳寶出長安書法  
妙入鍾王室騷命卑陵屈宋壇蒼梧碧竹復不少何  
言玉山與瓊島人生百歲苦多愁如翁千齡顏更好  
濟園東望是蓬瀛清淺當年幾度經自是泰階多景  
瑞珠躔已現老人星

漁陽老將行爲郭總戎建安賦

漁陽老將名家子少日趨庭弄文史操觚屢試不見  
收投筆悲歌辭故里桂玉蕭疎客帝城游談無術致  
公卿煙塵正滿漁陽道挾筴還爲塞上行爾時戚侯  
鎮北土七校屯營開幕府江南劍客擁轅門若個驍  
雄健如虎將軍自臂六鈞弓玉帳分符細柳東新降  
部落連青海見築亭臺跨遠空薊門論守不論戰十  
年左角無傳箭一朝碣石見桑田臺上黃金顏色變  
歸與彈鋏罷登壇手挽虹霓上釣竿東征西討年來  
事笑踞松根白眼觀西京有班今有郭文武聲華何  
磊落君家難弟定遠兄一片燕然銘再鑿聞君矍鑠  
壯不如八十欲近七十餘還看世業青雲遠盡出蘭  
臺舊著書

夜雨呈候吳郎

城南學作灤西屋炎天試借吳郎宿不知有何光怪  
發一夜蛟龍怒相逐雨聲徹旦雷聲奔列缺不斷高  
空痕崩濤萬壑吼萬馬此時已齧孤亭根爲客睡眼  
不曾著遣涉滄沱問安樂莫將風物動鄉愁且覆青



袁坊山館詩集 卷五  
州銀鑿落

吳郎歌送翁晉北遊京師

舊知吳郎名不識吳郎面長帆忽卷大江雲炎風五月來相見披衣倒屣開我關舉杯熟視成潺湲身如海鶴目巖電恍然再對吾師顏謂我垂髫稱國士于今垂白棲空山生死淒涼知己報南望其如路阻艱吾師當日詩名起後駕方稱王與李庭前秀出瓊樹枝復向騷壇執牛耳源泉萬斛瀉胷中風雨千重飛筆底能以遺形貌古人還將學步嗤餘子白眼情知禮法踈神心不受風塵滓北遊一泊汶陽船小穀城東寄數椽幾回暝色來新漲幾夜秋聲聽早蟬仰天擊劍舍我去又向長安大道邊昭王臺畔金精柱鄒衍宮前海氣懸弔古應歌明月塞憂時欲賦帝京篇江南才人滿人口目中如君不數有有衣莫染洛陽塵有錢莫買新豐酒漢廷公卿多世交燕市屠沽非素友君王正起通天臺子虛上林出君手男兒七尺遇有時安得奇才長不偶歸來爲我一掃岱峰雲夜看海中赤丸跳如斗

穀城山館詩集卷之六目錄

五言律詩

唐體樂府附

出塞

入塞

君馬黃

戰城南

巫山高

隴頭吟

上之回

長安道

洛陽陌

折楊柳

關山月

梅花落

雨雪

長干曲

江南曲

紫騮馬

送陳春宇太史冊封楚藩二首

送張洪陽太史請急南還

寄送朱可大南旋

同李前峰兵部趙竹里文學集侯氏東墅信宿

二首

少虛趙丈見過二首

雨中舟行

夜泊有懷

天津觀潮

泊潞河驛

哭沈虹臺太史二首

雨

告天臺為趙潞陽太史賦

題畫

夏日偕張洪陽殿讀懋龍

華寺寺在苑北湖上

夏日進講和張洪陽年丈韻

喜雨

七夕

秋夜

送懷上人還金陵

送張靜峰年兄赴河南南別駕二首

送李敏齋符卿奉使省覲

送鄒進士南臯謫戍貴陽二首

送習豫南太史謫居閩中二首

應制題畫四首

有序

寄馮志方博士二首

張洪陽殿讀待舟潞渚寄送二首

暮春同朱可大廷尉遊摩訶菴聽無絃上人彈

琴因飲南園二首

告中同可大再遊摩訶菴因贈靜堂禪師

寄庠師周介軒先生二首

秋日寄侯少泉叅戎黔中二首

贈談易王生

春半

望鶴

河西務雨夜

灤縣道中

天津月夜

楊柳青道中

德州舟中遇李戶部兩山北上別後却寄二首

武城懷古

臥病

菊花

輓趙少虛先生四首

寄賈廣文年伯兼謝惠氈

送林丈內艱南還二首

穀城山館詩集卷之六

東河于慎行著

門人邢侗校

門人郭應寵編

五言律詩 唐體樂府附

出塞

萬里關山道蒼茫玉塞秋沙飛晴作雨霧結且成樓  
羌管霜前怨胡笳月下愁酬恩懷一劍端不為封侯

入塞

穀城山館詩集卷六  
度漠滅天驕歸來意氣豪霓旌回瀚海羽蓋指臨洮  
少婦迎珠勒親兵賜錦袍勲多明主記不解假錢刀

君馬黃

寶馬來西極龍閑服上箱浮雲金勒影飛雪玉珂光  
骨凍長城水蹄翻大漠霜美人天路遠祇覺壯心傷

戰城南

塞北朝傳警城南夜合圍旗翻明月暗劍落曉星微  
朔氣聲刁斗胡霜卷鐵衣橫行期萬里酣戰不知歸

巫山高

巫山峰十二縹緲倚層空細雨猿聲外輕雲鳥道中  
江流巴子國月出楚王宮舊館今何處茫茫夢不通

隴頭吟

隴頭流水別淒響自堪驚月散東西影風傳遠近聲  
傍侵疏勒道斜入隗囂營嗚咽歸腸斷何時到渭城  
上之回

離宮陳上郡御輦出回中七校長楊北千官細柳東  
旄頭懸塞月漏箭雜邊風却望單于幕蕭條萬里空  
長安道

秦城山舍詩集卷一  
長光開紫陌春氣耀丹霞月落新豐樹烟籠上苑花  
金羈京兆馬繡轂富平車俠少逢何闊相過趙李家

洛陽陌

東都佳麗地笑指鬪雞坊挾彈妖童騎當壚小婦粧  
柳花金谷暗槐影玉溝長愁望飛塵起騎駟赭汗香

折楊柳

朱樓臨大道垂柳正依依葉淺低愁黛花輕上舞衣  
三河春欲盡五嶺戍初歸何地應腸斷關前雪正飛

關山月

三五關山月天空萬里秋影含青海動光度玉門流  
曉角傳軍壘寒烽隱戍樓胡兵方接戰且莫視刀頭

梅花落

腸斷金閨婦愁生畫閣梅瑤華風裏落玉樹雪前開  
拂影侵羅袂飄香上鏡臺關河春色暮鶴勒幾時迴

雨雪

陰山征戰地雨雪夜霏霏凍縮胡兒馬寒疑漢將衣  
范恭疎勒返蘇武漢南歸頗怪關門柳春前作絮飛

長干曲

妾住在長干離居歲欲闌洞庭歸客少浦口去人難  
雨落吳天暮雲橫楚岫寒含情何所待憔悴碧江湍

江南曲

采采白蘋洲蘭橈憶遠遊日懸雲夢闊天隔洞庭秋  
風物三湘道煙波萬里愁離居逢歲宴掩涕倚重樓

紫駟馬

寶馬蹀臯蘭紅塵撲繡鞍追風珠汗落踏雪玉蹄寒  
北地春方澁長城凍未乾一鳴思報主不取按圖看

送陳夷

太史冊封楚藩二首

遙遙江浦去望望洞庭西擁傳過三楚乘槎入五溪  
潮平津樹杳天闊浦雲低想到花源裏漁家路不迷

又

持節金閨客星華竝列侯遙分鸞掖色一作兔園遊  
日暮湘潭雨天寒夢澤秋豈應歌故里白雪少人酬  
送張洪陽太史請急南還

寧親承予告秋盡理行裝橐載蘭臺筆衣殘粉署香  
酒邊燕月近帆外楚天長舊識張華劍寒鋒自豫章  
寄送朱可大南還



自別春湖去音書已隔年所嗟千里夢常在五雲天  
雨色維楊樹江聲北固船經過多逸興佳句向誰傳

同李前峰兵部趙竹里文學集侯氏東墅信宿

二首

十載談經地重來徑已荒野花含宿雨秋草上空牆  
客送新醅酒樓懸舊臥牀曉涼憑檻立山色四蒼蒼

又

故人復此地不醉欲如何世事杯中盡年華鏡裏過  
孤雲留閣樹殘日掛煙蘿惆悵王孫去門前芳草多

時侯兄少泉  
從軍塞上

少虛趙丈見過二首

上客回高駕過予松桂林題詩白雲暮對酒飛花深  
遠樹浮殘雨高城下夕陰草玄芸閣吏寂寞此時心

又

經春猶臥病長日掩衡門豈謂山陰棹能尋谷口村  
世情雙白眼生事一青尊不淺忘年契千秋事可論

雨中舟行

天闊雨冥冥孤帆過驛亭雲吞江樹白霧失曉峰青

岸鳥迎船濕河魚出網腥生涯多少恨無處異飄萍  
夜泊有懷

月白夜將闌潮平兩岸寬倚舟人語靜過雨樹聲寒  
戍鼓城隅覓船燈水際看所期江路迥何處采芳蘭

天津觀潮

六月天山雪寒濤亦壯哉聲疑吹地轉浪莫蹴天開  
估舶迎風住漁舫弄水迴方聞通海運萬櫓日邊來

泊潞河驛

行盡燕齊道來從上國遊飽經湖上雨寒泊驛邊舟  
朔氣雄三輔關門控九州五陵十萬戶夾岸起朱樓  
哭沈虹臺太史二首

故人忽云沒聞報涕洟瀾今日吳江冷當時易水寒  
青編門下受丹旄路旁看夜雨玄猿嘯浮生夢已闌  
又

思君不忍問河上返孤舟豈是懷沙怨應非蹈海遊  
花殘吳苑暮鶴唳月亭秋腸斷論交地宮城十二樓  
雨

城夕涼風起空堂颯似秋片雲生遠岫驟雨過重樓

暝色階前樹寒聲峽外舟鷗鳧何自喜汎汎滿清流  
告天臺爲趙澌陽太史賦

邈矣高賢操清風華胄傳畏知嚴暮夜考履質青天  
國史千秋在家聲異代懸只今臺上月猶照舊爐煙

題畫

黯淡秋湖色涵虛望渺然斷橋橫落日遠水出寒煙  
鴈向平沙落鷗依折葦眠吾家住湖上聞殺采菱船  
夏日偕張洪陽殿讀懋龍華寺寺在苑北湖上  
同過湖上寺伏日坐清涼雲水浮僊闕松杉蔭講堂  
雨歸蓮葉淨風起稻花香小借支公榻人天午夢長

夏日進講和張洪陽年丈韻

秉燭趨丹禁橫經侍法筵曉涼生殿閣旭日動雲煙  
珮委天香散花深玉漏傳非材慙獻納鵠立細旃前

喜雨

春來全未雨一夜雨成林觸石何時聚崇朝已自陰  
錦林花氣重金闕漏聲深潤澤占天造殷憂慰聖  
心

七夕

客中逢七夕片月倚重樓靜對星河夜涼生枕簟秋  
人間渾是夢天上亦多愁覽鏡驚雙鬢空悲歲序流

秋夜

虛閣夜沉沉秋聲在樹林山中猿鶴夢客裏歲年心  
露下蓮塘冷螢流薜幌深坐來銷萬籟隱几自成吟

送懷上人還金陵

空門無所住亦復憶江鄉半偈禪心定孤舟別路長  
錫飛吳葉冷筆拂楚花香又向秋山裏鐘聲閉夕陽

送張靜峰年兄赴河南別駕二首

十年南省客半刺領東周馬向雲中去人稱洛下遊  
關河三輔道雲物二陵秋別思還蕭索寒塘水自流

又

承寵無遲暮褰帷意氣生諸侯均揖讓長吏有逢迎  
郡閣山當戶河橋柳向城三川風日好偏適宦遊情  
送李敏齋符卿奉使省覲

只今三省佩又下五城樓薊北霜初落淮南桂已秋  
宮雲隨子舍卿月引行舟可奈河橋柳年年綰別愁  
送鄒進士南臯謫戍貴陽二首

自憐焚草日却送看花人迢遞三危路飄零萬死身  
長沙悲賈傅湘水弔靈均總是經過地將誰采白蘋

又

網常千古事憐爾志如霜首欲階前碎珠憑領下藏  
有生心盡折縱死骨猶香不似青蓮客無端謫夜郎

送習豫南太史謫居閩中二首

渺渺寒江路君今歲宴遊十年池上珮萬里雪中舟  
仕節人誰識浮踪水自流含情無可道不獨爲離憂

又

對酒不能飲心悲握手論如何同舍客忽作遠遊人  
世態青雲冷交情白首新定知明主意宣室待詞  
臣

應制題畫四首

有序

萬曆戊寅正月 上出內府畫冊二十六幅命

日講六臣分題奏上各 賜銀豆一包時同事

者宮詹吳門申公宮諭信陽何公宮洗新都許  
公宮贊武陵陳公翰撰南充陳公也予分得四

題如左

輕綃寒色動不是月華開鳥道千巖迥江光一徑迴  
虛無分玉樹彷彿想瑤臺未擬歌黃竹陽春徧九垓

右雪景

瀟瀟一幅上秋氣滿楓林半似隨風引全疑夾霧陰  
遠峰看處暝疎樹望來深筆底煙雲色爭知用作霖

右煙雨

筆端成大造海鳥若相忘暮雨汀莎濕春風岸芷香  
柳邊迷落絮雲裏帶飛霜總爲經天藻長留羽翰光

右宣廟御筆汀鷺

渺彼榆枋翼丹青畫作真靜眠宮草日閒傍苑花春  
顧影驕金距逢場上錦茵非同珠樹鳥獨用羽毛珍

右鷓鴣

寄馮志方博士二首

一別袞衣客今來幾歲星吳鉤知射斗魯壁記傳經  
對酒春雲碧題詩暮雨青向時遊賞地南北各飄萍

又

幽人渺何許江上舊儒冠客舍蒹葭雨堂食苜蓿盤  
楚天秋水闊燕闕曉鐘殘懷袖雙紈扇因風欲寄難

張洪陽殿讀待舟路渚寄迭二首

昨日橫門道魂消髮欲秋寸心應未遠尺素已堪愁  
對酒青燈醉看花紫禁遊離情如潞水連夜只東流

又

歸夢春來劇那堪迭遠遊身懸蝸左角家在海西頭  
天地才難盡風塵道不謀河隄楊柳綠亦欲買歸舟  
暮春同朱可大廷尉遊摩訶菴聽無絃上人彈  
琴因飲南園二首

福地開真境蕭辰欵梵筵百花春夜雨一飯講堂煙

妙法旃檀喻空音綠綺傳雲牀容臥起隨意檢詩篇

又

別有祇園勝春光象外幽人從蓮社飲地勝竹林遊  
雨色陰蘿幌鐘聲度石樓不愁歸路晚乘月可淹留  
告中同可大再遊摩訶菴因贈靜堂禪師

寺憶同遊地聯鑣許再過人行松院少雲閉竹房多  
歲月容高枕乾坤足放歌逃禪吾不厭病骨本維摩  
寄庠師周介軒先生二首

傳經西楚客垂老意何如湖上十年夢燈前八月書

秋心隨過鴈舊事紀銜魚門下垂髻士脩脩兩髻踈

又

望望徐方道懷人白露秋湖光晴載酒山色暮登樓  
倦迹看林鳥閒情寄海鷗紅顏殊未老欲接羨門遊  
秋日寄侯少泉參戎黔中二首

萬里天南極將軍尚枕戈一醒燕市酒五見洞庭波  
霧急鳶常墮江深鴈不過東山棲隱地何日共煙蘿

又

自爾烏蠻去寒花幾度開萍踪兒女大華髮歲時催  
別夢隨關月離愁落隴梅年年秋色裏一見尺書來

贈談易王生

脩然江上客讀易舊儒生道自青囊秘名因綠簡成  
漢京談季主蜀肆隱君平爲叩盈虛理因探百物情  
春半

臥病忽已久閒房鳴素琴徘徊紫芝意惆悵青春深  
芳草亂迷徑殘花空滿林憑軒送高鳥馳思渺難任  
望鶴

縹緲珠庭鶴翻飛別禁林初盤僊闕遠漸入海雲深



忍負乘軒寵應非避弋心  
瑶臺多舊侶愁絕王笙音  
河西務雨夜

歸舟今信宿猶倚潞河干  
樹色春汀暗雞聲夜雨寒  
孤帆燈際落短劍酒中彈  
明發乘流進滄波正渺漫

灤縣道中

江草正萋萋蘭橈傷古堤  
淡煙高樹杪斜日亂帆西  
隴麥蒸雲動春鳩夾岸啼  
連朝隔城市疑入武陵溪

天津月夜

放舟乘晚浪伐鼓注歸流  
明月千帆夜長風萬里秋

篙師探渡口津吏指潮頭  
浩蕩煙波裏應憐估客遊

楊柳青道中

鳴榔凌海月捩舵破江煙  
楊柳青垂驛蘼蕪綠刺船  
笛聲邀落日席影掛長天  
望望滄洲路從茲遂渺然

德州舟中遇李戶部兩山北上別後却寄二首

廣川西渡口倚棹此逢君  
別久情難喻歡多酒易醺  
江聲過暮雨帆影夾殘雲  
躑躅南枝鵲能堪羽翮分

又

君登蘭省去予汎鏡湖歸  
兩槳還相背雙星竟不違

心期鷗作侶生事薛爲衣只有空山夢愁時少鴈飛

武城懷古

東郡武城乃平原君舊邑世謂言游所宰誤也

停橈齊趙路河上見孤城故國佳公子高臺亦已傾  
川光孤嶼歛暝色片雲生嗚咽清漳水千秋恨未平

臥病

天地長貧日風塵臥病年閉門春雨後欹枕落花前  
石火應難駐蘭膏莫自煎無生如可悟吾意欲逃禪

菊花

幾年京洛客不對故園花今日重陽酒還過處士家  
娟娟霜蕊靜裊裊露枝斜自愛貞心苦含香閱歲華  
輓趙少虛先生四首

去矣雲林客傷哉藝苑豪百年雙白髮萬事一青袍  
道自平生拙名堪此日高所悲逢聖世汨沒掩蓬蒿  
其二

文雅從茲盡榮華亦有休吾徒還一涕爾輩自千秋  
舊館青山暮重泉白日幽惟餘清汶水長繞墓田流

其三

十里春風苑年年出漢關調空高淥水俗自薄朱顏

星彩歸天上玄經播世間乞銘遺札在一讀淚潺湲

其四

浮沉千古事無力念鴻鈞陵替存吾道窮愁竟爾身  
馮唐空自老原憲不知貧他日山陽路誰為笛裏人

寄賈廣文年伯兼謝惠氈

極目漳南道相思正杳漫愁時明月近別後素書難  
雪暗芙蓉閣春生苜蓿盤一氈猶寄遠應惜玉堂寒

送林丈內艱南還二首

慘淡歸人意春前問去舟參商初兩地膠漆已三秋

雨色低津樹江光隱驛樓庭花多所恨不是錦衣遊

又

把袂憐同舍離愁可奈何定知秋鴈少惟有月明多  
江上思瓊樹風前廢蓼莪無令清夜夢不入舊鸞坡

穀城山館詩集卷七目錄

五言律詩

春日同于子冲上靈巖寺四首

寄張玉陽年兄汴上

閣夜

雲翠山天觀和朱可大韻

洪範池和韻

秋日同朱令君泛舟西汀二首

送崔亞沂博士遊齊

樓居

夏日閑居

東郭草堂卽事

過雨

小樓

雨中東流泉上同可大賦

中秋小岱山對月 山莊卽事

有懷蘇八長史 入都再遊摩訶禪林

再至長安見無絃上人移住法藏菴因聽彈琴

賦贈

春日同朱可大起部馮用韞太史同遊恩隆觀

暨侍中園紀事二首

同館諸丈城西看花二首

朱可大邀同馮太史飲摩訶菴南園步至釣魚

臺夜眺還宿法藏精舍次日觀慈壽浮圖紀

遊四首

三月廿八日葛龍池朱訥齋二工部馮琢吾葛

鳳池二太史同遊城西黃侍中園林看花四

首

同可大用韞登毘盧閣

毘盧閣送可大南旋

朱大司空挽歌八首

浪迹

春日寄題東郭草堂

月夜舟行

邵伯湖夕泊

儀真野泊

金陵江口夜泊

舟中家報

魏國東園宴集

天界寺禪房呈訥菴棠軒二丈

黃儀庭司成邀集馮虛閣

九月八日羅康洲宗伯黃儀庭司成田鍾台宮

諭習豫南司成會集朝天宮道院

穀城山館詩集卷之七

東阿于慎行著

門人邢 侗校

門人郭應寵編

五言律詩

春日同于子冲上靈巖寺四首

寺自高齊闢山從岱嶽盤雲霞千嶂曉風雨萬松寒  
路繞泉聲入花分鳥道看正聞鐘磬發作禮叩旃檀

其二

爲訪名山勝來叅梵帝筵烟霞圍寶地龍象擁諸天  
喻法曇花落翻經貝葉傳朗公今化石不轉謁金仙  
山有朗  
公石

其三

春陰連嶽麓法界滿祇林巨壑浮雲細懸崖白日深  
野僧閒入定山鳥靜多音幸共齊年侶同皈出世心

其四

雙峰最高頂倚杖白雲扉樹杪看人出山坳送鳥飛  
鐘聲衆壑滿香靄下方微三觀憑闌得因風欲振衣

寄張玉陽年兄汴上

我行殊未久君亦解朝衣世路無工拙時名有是非  
莫談温室樹聊采北山薇夢斷夷門道秋深鴈不飛  
閣夜

何處夜色好月明獨倚樓一聲長笛起吹裂萬山秋  
風露淒以冷星河靜欲流懷人不可見天末眇含愁  
雲翠山天觀和朱可大韻

碧山吾欲隱雙屐且隨君星斗巖前接藤蘿杖底分  
泉聲渾作雨嵐氣稍成雲愁對仙壇月鸞簫午夜聞

洪範池和韻

何地探靈境仙泉舊有名天光金鏡冷潭影玉壺清  
溪鳥依人立林蟬盡日鳴魚龍今寂寞不與夜珠驚

秋日同朱令君泛舟西汀二首

舊向滄洲隱今陪茂宰遊笛聲催畫鷁帆影掛淨鷗  
酒對青林暮歌翻白苧秋花源多少路隨處有漁舟

又

蕩漾千峰色輕舸入翠微鳧迎仙令鳥鷗拂野人衣  
听柳晴猶濕江雲冷不飛天風乘醉起吹送月中歸

送崔亞沂博士遊齊

共作名山隱相將采蕨薇寧辭今日別祇恐故人稀  
斗酒不得醉白雲相與歸秋來玄鴈度可向海門飛

樓居

樓居非有好高枕自人間夜色尊前月春陰檻外山  
日隨歸鳥盡心與片雲閒未遣浮名累虛稱善閉關

夏日閒居

空林銷永日不暑亦無喧種藥時窺圃攤書每閉門  
雨痕侵柱礎苔色上松根此意應誰識惟偕靜者論



東郭草堂卽事

結廬非異境負郭少將迎竹嶼含雲影松牕落雨聲  
片峰當戶出衆鳥隔林鳴宴坐幾無念誰知絕世情

過雨

五月不知暑虛堂颯似秋殘虹掛溪水片雨過城樓  
遠樹斜陽駐深山夕翠流晚涼思枕簟絕愛北牕幽

小樓

小樓常有伴端不嘆離群牖納青溪月簷飛翠岫雲  
自歲東觀草誰勒北山文最悵霜空鴈寒聲靜夜聞

雨中東流泉上同可大賦

風雨鳴丹谷林亭倚翠岑一尊今日酒千里故人心  
樹動三秋色泉飛萬壑音夜涼橫吹起直欲想龍吟

中秋小岱山對月

此夜寒無奈瑤壇近斗牛山名真小岱月色正中秋  
影入河蟾濕光翻樹鵲愁只疑叅嶽頂笙鶴上宮遊

山莊卽事

逃名天地闊斗室寄山椒地僻常無客林深亦有樵  
飯牛春待雨放鶴夜聞簫不是淮南隱淹留未可招

東郭草堂卽事

結廬非異境負郭少將迎竹嶼含雲影松牕落雨聲  
片峰當戶出衆鳥隔林鳴宴坐幾無念誰知絕世情  
過雨

五月不知暑虛堂颯似秋殘虹掛溪水片雨過城樓  
遠樹斜陽駐深山夕翠流晚涼思枕簟絕愛北牕幽

小樓

小樓常有伴端不嘆離群牖納青溪月簷飛翠岫雲  
自藏東觀草誰勒北山文最悵霜空鴈寒聲靜夜聞

雨中東流泉上同可大賦

風雨鳴丹谷林亭倚翠岑一尊今日酒千里故人心  
樹動三秋色泉飛萬壑音夜涼橫吹起直欲想龍吟

中秋小岱山對月

此夜寒無奈瑤壇近斗牛山名真小岱月色正中秋  
影入河蟾濕光翻樹鵲愁只疑叅嶽頂笙鶴上宮遊

山莊卽事

逃名天地闊斗室寄山椒地僻常無客林深亦有樵  
飯牛春待雨放鶴夜聞簫不是淮南隱淹留未可招

有懷蘇八長史

三蘇稱大雅季子復能文老作諸侯客名高國士群  
別心燕塞雨旅舍鵲湖雲家學枚臯在詞壇已策勲  
入都再遊摩訶禪林

為憶青蓮社重尋舊法堂壁題存姓字階樹閱行藏  
覺路人天迴春輝佛日長爾時京洛客曾識兩花香  
再至長安見無絃上人移住法藏菴因聽彈琴

賦贈

別來何所住卓錫自成林幡影香臺靜鐘聲竹院深

一花開佛土半偈定禪心揮手松風裏依然未鼓琴

春日同朱可大起部馮用韞太史同遊恩隆觀

暨侍中園紀事二首

常侍先朝貴仙宮上苑西野分青嶂迴路入白雲迷  
深樹花初發閒堦草自萋當年供奉地猶揭舊璇題

又

小有蘭亭勝臨流一放歌酒邊橫落照花底拂回波  
何地疎狂少吾徒聚散多春衣渾欲綠知是藉烟蘿  
同館諸丈城西看二首

別苑惜春殘開尊聚舊歡花間張綺幕柳外簇雕鞍  
飛雪歌中度回風掌上看倚闌渾欲醉猶索酒盃寬

又

十載嘆西東歡娛此日同容華青鏡裏身世綠尊中  
花氣看無賴鶯歌聽不窮何妨歸騎緩蹀躞受東風  
朱可大邀同馮太史飲摩訶菴南園步至釣魚  
臺夜眺還宿法藏精舍次日觀慈壽浮圖紀遊  
四首

南園

勝會開芳苑春愁入遠峰壺觴連竹樹歌吹起魚龍  
花落空林雨風傳別院鐘淹留公子愛移席轉從容

釣臺

行歌隨步遠已到水雲天夜色千峰月湖光萬頃烟  
銜盃心跌宕脫帽態踈蹣醉眼迷歸徑相看枕腹眠  
法藏菴

何必耽丘壑居然鹿苑棲片雲雙樹頂孤月上方西  
罷酒聞清梵探詩見舊題歸依空品相不省在招提

慈壽寺閣

隔夜忘醒醉窮遊別起端紺林重駐馬實閣幾憑闌  
飛糾金銀湧迴峰紫翠盤皇都多鉅麗是處有奇觀  
三月廿八日葛龍池朱訥齋二工部馮琢吾葛  
鳳池二太史同遊城西黃侍中園林看花四首  
不奈連朝病因看上苑春如何五侯第又見百花新  
日映丹霞暈烟凝絳幄塵狂來無藉在屢岸白綸巾

其二

真賞誰應共風流是舊歡藏書周太史襍被漢郎官  
花氣尊中滿松聲座上寒相逢休惜醉春色欲凋殘

其三

改席臨虛榭為歡事每奇控弦天苑騎跳劍內園兒  
小榻時欹枕疎簾久對碁稍聞深樹裏風送桔槔遲

其四

誰謂長安陌風塵此地稀山光相映帶野色自芳菲  
旭日薰歌扇輕花着舞衣馬蹄歸欲懶為惜送春歸  
同可大用韞登毘盧閣

人天標勝境暇日一啣盃烟樹重城合香花萬井開  
懷鄉遊子念作賦客卿才愁見門前道車塵日夜催

毘盧閣送可大南旋

梵閣俯珠林龍宮歲月深  
幾人同嘯詠此日復登臨  
畫棟含朝雨青峰起暮陰  
不堪歡會地又悵別離心  
朱大司空挽歌八首

有偉生民傑鴻名日月光  
三朝熙揆路八座麗文昌  
尚想玄圭錫俄驚白壁藏  
平生門下士歌殫不成章

其二

此日飈輪遠何年畫閣開  
勲猷金匱史文賦栢梁才  
故事傳西省遺恩照夜臺  
淒清華表月不見鶴歸來

其三

再領河隄節三行海國春  
吏人虔俎豆父老愴車塵  
百折風雲地諸艱社稷身  
祇今渠畔柳遊客亦沾巾

其四

緬想三朝事聲華似夢中  
職分虞百揆爵視漢三公  
忼慨回天力酸辛蓋世功  
惟餘秋隴上蕭瑟白楊風

其五

十載江臯臥蒼生望更頻  
如何三島夢忽斷五湖春  
南嶽收真氣中朝失舊臣  
尚方雙賜履猶覺上星辰

其六

真宅歸丹府蓬壺第幾城  
化龍應是劍跨鶴不聞笙  
舊戟朱門列新阡紫氣縈  
元公車服在餘慶屬玄成

其七

傳道松臺路玄冬蜃衛張  
期門分羽騎温室出黃腸  
日月懸天藻螭龍護帝章  
從今鶉火次夜夜有光芒

其八

淒涼知己報舊事總堪愁  
問字春風館傳經夜月樓  
十年違換履一夕嘆藏舟  
惟有延陵劍堪懸宰樹秋

浪迹

浪迹長安陌修途日以難  
河流誰謂廣海水自知寒  
懶嫚存愚性娑娑恥貴官  
春深湖上雨何處少漁竿  
春日寄題東郭草堂

長憶青門郭芳菲此日殷  
花開三月雨春隔萬山雲  
夜鶴應誰怨汀鷗且自群  
主人有歸夢莫勒北山文  
月夜舟行

烟江三五夜獨月引行舟  
野色推蓬合波光進艇留  
銀蟾天上濕烏鵲渚邊愁  
那聽樓頭笛懷鄉鬢欲秋

邵伯湖夕泊

日暮倚蘭橈秋江正寂寥  
驛門斜對雨郡郭遠通潮  
急櫓看商舶寒燈見市橋  
隋堤前路近欲聽月中簫  
儀真野泊

潮平楊子渡宿昔繫扁舟  
日落波光斂天長島色浮  
雨侵依岫樹晴見隔江樓  
只尺分吳楚茫茫萬古愁  
金陵江口夜泊

孤舟江上宿秋夢耿難成  
片月中流影千帆夜半聲  
地隣桃葉渡山近石頭城  
倚舵聞吳詠偏令旅思生

舟中家報

澤國三千里題書轉自愁  
鄉心河畔草客夢雨邊舟  
月落維揚夜江深建業秋  
歸程應未遠時撫大刀頭  
魏國東園宴集

華館開名會高城倚落曛  
林芳秋過雨竹翠午侵雲  
洞夾平臺入橋通曲水分  
太平多宴樂勝地屬元勳  
天界寺禪房呈初菴棠軒二丈

蕭晨遊法苑迴眺出雲峰  
秋色霜前鴈寒聲雨後鐘  
酒隨陶令醉談許惠休從  
何意風塵地居然白社蹤



黃儀庭司成邀集馮虛閣

振衣山畔寺載酒寺邊樓  
笛散千峰雨砧傳萬井秋  
地因邀月勝人擬御風遊  
不盡蕭森氣寒江正北流  
九月八日羅康洲宗伯黃儀庭司成田鍾台宮  
諭習豫南司成會集朝天宮道院

仙臺隣上苑路出冶城邊  
暝落珠宮雨寒飛玉樹烟  
鴈來秋水外人醉菊花前  
明日還重九莫觴可更傳  
西園諸同年夜宴

歡劇西園會銜盃夜色前  
池塘餘暮雨竹栢淨秋天  
月出三山樹鐘銷九市烟  
良遊俱舊侶把臂惜華年  
南曹諸友邀遊祖師堂

融公棲隱處遙在翠微巔  
徑折全無地峰回半有天  
鳥啼雲洞雨花散石堂烟  
幸假登高會同叅最上禪  
牛首東峰同諸君覽眺

兩峰原自對萬壑遠相縈  
地盡芙蓉閣巖開薜荔屏  
江光天際白山色雨中青  
不淺憑闌興吳歌倚醉聽  
長干

白門通市里傳是古長干  
陌柳藏鴉曙秋潮帶雨寒

橫塘歸客斷子夜舊歌闌別是繁華地休將六代看  
秦淮

秋月秦淮岸江聲轉畫橋市樓臨綺陌商女駐蘭橈  
雲裏青絲騎花間碧玉簫不知桃葉水流恨幾時消

青溪

鳴珂傳舊里彌望總汙萊片雨湖邊落重橋苑外開  
草荒江令宅花覆陸機臺尚想風流地空悲異代才  
房侍御邀登觀音臺

桀觀俯重臺烟波四望開霞邊千樹沒盃底片帆來  
霜月寒相射雲鴻暮轉哀滔滔大江水到海幾時迴  
攝山夜宿予懷上人

十年渾似夢相見各依然僧臘青山老詩名白社偏  
松間對微月竹裏聽流泉預悵明朝別西風送客船  
攝山觀無盡禪師入定

師今方入定勝果幾時成法向無空滅心因不住生  
濕灰猶示相槁木可爲形恍忽蓮臺上人天湧化城  
京口贈鄔山人汝翼

握手秋江上依然舊布袍十年燕市酒八月廣陵濤

俠骨貧逾健狂歌醉正豪不緣湖海遇何地見風騷

京口贈陳從訓文學

陳生何磊落一劍向飄零雅好詞人賦休傳博士經  
靡蕪春渚綠薜荔舊山青莫謂江天遠薇垣現客星

滁陽道中遲李棠軒年兄未至題書驛壁

江樓三日別相逐不相逢回首秋山路寒雲隔幾峰  
鄉心朝見鴈行色夜聞鐘何地還盃酒惟尋放鶴蹤

閏月朔日道中憶東園菊

今年九月菊應自斂芳菲秋色未云暮遊子將欲歸

繫心霜露滿凝恨鴈鴻稀想到尊前見寒香正點衣

輓中立宗侯四首

彼美銀潢彥名高魯國儒藏書淹四部作賦侈三都  
日瑩瑤臺雪天沉碧海珠十年懷舊賞腸斷綠雲孤

其二

誰言天路遠儵爾賦遊仙貌憶登龍日神疑化鶴年  
墨堂苔蘚閉畫閣網絲懸忍望邾城墓蕭蕭宰樹烟

其三

斯人不可見一代失風流未就黃金藥先成白玉樓

才高留海內賓客散池頭此夜朱門月空悲兔苑遊  
其四

芳草春來綠王孫去可傷憑誰傳舊業先自棄高堂  
笙鶴渾疑幻人琴盡欲亡平生知己淚一濕薜蘿裳

穀城山館詩集卷八目錄

五言律詩

懷寄張玉陽年丈二首

薊門行四首爲于大夫子冲賦

奉寄李北山先生四首

同馮殿講琢吾夜過東隣魏光祿見泉二首

夏日過雙寺贈寶藏法師

代書荅陶比部蘭亭

贈人爲金吾郎二首

可大邀遊張常侍園二首

壽寶藏上人二首 送侯六參軍

送妹倩李子授侯門教讀

出塞四首為遼左李大將軍賦

懷周公瑕

詠史

周公瑕有書見問寄荅

春日有懷東郭草堂

閣夜

報鄔山人汝翼

報翠雲山道人許公

春暮

臥病

閉門

告中馮用韞宮諭朱可大丞卿見過

小閣

可大遊摩訶菴有詩見示賦荅

孤鴈

上書

雨中遣使買舟

乞休

聽姜生彈琴

寄題楊夢山先生半間樓

新城館中夜坐

白溝河

途中書懷二首

單家橋

暮抵德州城下

荏平道中感懷

桐城望見雲翠諸山

立春日楊戶部廬山謫官河南枉道過訪

除夕前四日送楊戶部之官河南

抵舍承邢知吾侍御賜問裁荅二首

歸日王興甫文學于子冲大叅來視

輓趙秀才竹里二首

目錄終

穀城山館詩集卷八

東阿于慎行著

門人邢侗校

門人郭應寵編

五言律詩

懷寄張玉陽年丈二首

怊悵前年別綿綿歲月征積薪從古嘆殺杼至今驚  
春雪梁園道秋江建業城行蹤何處問愁絕鴈來聲

其二

聚散年來事茫然思不禁薄遊交道淺久宦世情深  
別日楓林夢愁時桂樹吟悠悠大河水詎盡尺書心  
薊門行四首爲于大夫子冲賦

漁陽開幕府授鉞魯諸生廟畧魚麗陣軍符驃騎營  
懸金親教射畫地細論兵半醉歌聲起風高右北平  
其二

少年多意氣仗節赴燕雲曉月懸弓影春星吐劍文  
防秋歌出塞逐虜賦從軍未許平陽騎橫邀萬里勳  
其三

九月平原獵材官大合圍雪凝驕馬汗鐵澁侍兒衣  
塞鴈連天起征蓬卷地飛此時胡膽落前隊射雕歸  
其四

邊烽傳大漠一劍夜臨關鳥道千重戍龍城萬仞山  
降胡旗下出候騎雪中還苦樂行間事魂銷壯士顏  
奉寄李北山先生四首

當代論騷雅公存大國風源流千古見才儁一時空  
歲月駕行外江湖鶴髮中倚天長劍在猶覺氣成虹  
其二

先朝老法從白首臥巖阿避世交遊簡藏山論著多  
醒酬漁父問醉倚雪兒歌大有餐霞秘紅顏盛若何

其三

雅道何寥廓時名易陸沉不因今日論寧見異時心  
剪拂千金價宮商萬籟音故交無沒久亦許附詞林

先君爲公舊友  
承采遺詩故云

其四

龍門何日御流想碧山隅文雅從先進聲名避大巫  
白雲康樂墅春酒步兵厨早晚抽簪去能容絳帳趨

同馮殿講琢吾夜過東隣魏光祿見泉二首

一曲宮城陌君今幾卜居小開蔣詡徑別作子雲廬  
花落藏書後風生漉酒初相逢殊恨晚傾蓋意何如

又

舊好應無厭新知亦已歡銜盃遲月上揮塵惜燈殘  
世態閑堪見浮蹤拙自安所欣東壁影時近夜光寒  
夏日過雙寺贈寶藏法師

偶過城北寺一憇寶公堂午飯青精滑新茶玉乳香  
踈鍾沉片雨高樹出斜陽爲叩經行地浮盃海路長



代書荅陶比部蘭亭

落魄佳公子天涯可定居  
適來江上使傳得篋中書  
湖海名方盛雲霄事轉疎  
沉冥吾所慕數飲態何如  
贈人爲金吾郎二首

俠少羽林郎承恩直建章  
臂鷹馳道側調馬御樓旁  
夜月燒燈苑春風感鞠場  
錦鞬渾未脫十日從長楊

又

陌上錦雲連期門校獵旋  
射聲銀作鐫躡影玉爲鞭  
撒草連雙兔凌空接兩鳶  
應憐漢飛將白首滯窮邊

可大邀遊張常侍園二首

夙慕名園勝因君載酒看  
山容虛榭滿竹色小樓寒  
地主更新貴遊人續舊歡  
愁中春色過纔此一憑闌

又

五侯開別館平野碧湖東  
乳燕翻槐日鳴鳩試麥風  
水窮千樹裏亭隱百花中  
却憶山園路芳菲正滿叢  
壽寶藏上人二首

舊檢高僧傳林公勝範稀  
安禪多寶座印法六銖衣  
雨落時聞梵花開自掩扉  
空門忘歲月幾見劫塵微

又

壽者原無相何因證大齡階前雙樹老閣上片山青  
地傍蒼龍闕函開白馬經應憐朝市客幾日鬢毛星  
送侯六參軍

燕城秋欲暮疋馬送君還投筆書生志鳴鞘壯士顏  
邊風吹錦帶海月落刀環慷慨匡時略何年出玉關  
送妹倩李子授侯門教讀

天涯思弟姊見爾帝京遊捧檄趨軍府彈冠傳子侯  
黃花征路晚玄鴈塞城秋那值池塘恨臨風滄泗流  
時方有亡兄之戚故云

出塞四首爲遼左李大將軍賦

塞上發鳴笳軍聲動地譁九邊徵毅騎七校選良家  
曉月分弓影秋霜吐劍花主恩何以報急爲掃胡沙  
其二

銅符天上至漢將出龍城雲鳥圖成陣河山幕作營  
日凝金玦色磧冷鐵衣聲早報匈奴滅西京甲第成  
其三

元戎新授鉞俠少遠從軍菟塞秋山合龍城舊路分

角聲吹凍雨旗影亂浮雲百戰城南道方成上將勳  
其四

玉節君王詔軍中夜築壇金人歸少府鐵騎散材官  
漢戍三秋斷胡霜萬里寒功成多意氣歌舞入長安

懷周公瑕

苦憶吳門隱翛然一釣竿烟霞雙鬢老天地五湖寬  
閱世憑烏几迹名著鵷冠何時燕市裏重逐酒人歡

詠史

十八侍中郎春深侍建章呼盧金卮側蹋鞠玉樓旁

夜賜離宮酒朝薰異國香可憐秦殿女向月卷羅裳

周公瑕有書見問寄荅

故人何所似契濶嘆多年舊事閑應記新詩老更傳  
花開三徑雨門閉萬峰烟猶采相思樹封題到遠天

春日有懷東郭草堂

吾廬吾所愛雖小却宜春草色常經雨花香不受塵  
歸期何日定旅夢此時真怨殺烟臯鶴臨風待主人

閣夜

隱几虛堂夜幽懷誰與論星河臨九陌鍾漏徹千門

黯淡傷春事，踟躕念主恩。薜蘿今已綠，歸路滯王孫。  
報鄔山人汝翼

念子不能寐，三年闕報書。自緣歸興久，非是故情疎。  
南北無寧歲，江湖有索居。爾時吳市隱，寥落復何如。  
報雲峰山道士許公

契濶茅山侶，書來見素心。養砂還守竈，種樹已成林。  
月出巖泉冷，花飛石洞陰。知君相憶久，日聽曉猿吟。  
春暮

歸心無可奈，先作送春歸。細草河隄合，殘花苑路飛。  
夢迴雙闕雨，思遠舊山薇。想到征輪動，薰風已上衣。  
臥病

臥病已三月，歸圖猶未成。慰留明主意，推挽故交情。  
御路薜蘿發，春山杜若生。湖邊小行徑，處處有魚羹。

### 閉門

閉門多所適，懶與病相宜。岸幘全忘沐，匡牀久未移。  
酒醒微雨夜，衣減落花時。只憶河橋柳，應餘未折枝。  
告中馮用韞宮諭朱可大丞卿見過

臥閣荒三徑惟容二仲過借書酬寂寞說劍慰蹉跎  
末路交情少他年別思多東門楊柳色執袂可如何

### 小閣

小閣經時臥琴書靜不譁丹衷猶戀主清夢已還家  
幾對春城月虛開杜曲花一牀餘丈室渾似住毘邪  
可大遊摩訶菴有詩見示賦荅

少壯歡娛地憐君只自遊一春全臥病舊事幾經秋  
聽雨花間坐飛觴石上流歸心將別恨憶此更悠悠

### 孤鴈

池上孤鳴鴈因風憶斷行凋蕭形影共踟躕羽毛傷  
有恨驚霜露無心慕稻梁如何伴籠鳥噉噉玉人傍

### 上書

上書書未報旅思且盤桓天意高誰問人情巧自看  
味兼甘苦盡色併笑啼難耿耿孤臣志惟餘一寸丹  
雨中遣使買舟

時節忽復易閑居事更幽微風吹木杪斤雨到牀頭  
未解虞卿印先尋范蠡舟行裝書數卷沾濕不無愁

### 乞休

東髮登朝列承恩歲月深病酬吳客問思作越人吟  
世事容蕭散時名任陸沉本無匡濟畧報國在抽簪  
聽姜生彈琴

客來山水際爲我鼓鳴琴月泛三湘色松流萬壑音  
焚香消晝永啜茗到更深莫漫彈招隱方懷桂樹吟  
寄題楊夢山先生半間樓

舊有滄洲興今成綠野遊桃花千樹雨月色半間樓  
隱几山光入開簾海氣收却令麟閣上圖畫想風流  
新城館中夜坐

獨坐燕南館挑燈坐自深還家遊子路去國適臣心  
落月征車動寒霜客袂侵陸沉非避世吾道在雲林  
白溝河

西風吹易水曉飯白溝河獵騎平原淺漁舟別渚多  
地分燕趙敵國感宋遼和今日逢全盛盧龍尚枕戈  
途中書懷二首

聖代無高隱行藏亦有因寡交思避世多病學全身  
止足存微尚安危付鉅臣所慙恩禮重雪涕念君親  
又

藪城山館詩集卷八  
太息宗祊計回天事信難三  
年頭欲白八疏口將丹  
璇海波能潤瑤臺月正安  
漢庭多疆項誰敢測宸歡

單家橋

十載橋邊路巾車此重過  
秋聲連渤海寒色下滹沱  
避地紅塵遠還家華髮多  
來時道旁柳生意稍婆娑

暮抵德州城下

瞥見漳河水燕齊兩界分  
郡樓融晚雪津柳掛殘雲  
病骨寒應倦鄉音近稍聞  
明朝看海氣遙禮泰山君

在平道中感懷

父老迎相問君今華髮歸  
雲霄身自貴家國事多違  
具邈嗟皆盡同遊旣已稀  
畏看舊門巷先有涕沾衣

銅城望見雲翠諸山

歸塗今日愜憑軾見吾山  
以爾千巖翠慙人兩髮班  
向來多遠夢從此閉重關  
不似終南路依棲慕世間  
立春日楊戶部廬山謫官  
河南枉道過訪

軒車來遠道執手意何長  
喜對春盤酒愁分畫省香  
士龍名入洛司馬賦遊梁  
莫漫悲岐路雄心在四方  
除夕前四日送楊戶部之官河南

送子歲云晏踟蹰可奈何酒邊生白髮雪裏渡黃河  
落魄才難盡飛揚意故多春風洛陽道早晚聽鳴珂  
抵舍承邢知吾侍御賜問裁荅二首

海畔投簪始伊誰問索居長安千里使濟水數行書  
世事焚魚外時名夢鹿餘平生周柱史避俗意何如

又

海嶽終堪隱風塵幾倦遊采芝隨綺季種竹待羊求  
月迴春天樹江寒雪夜舟何時芳駕至尊酒一淹留

歸日王興甫文學于子冲大叅來視

山齋春欲盡上客到羊求對月休愁思看山且醉遊  
蟻封知是夢駒隙信如流不見芄蘭侶辭官已白頭  
輓趙秀才竹里二首

別來能幾日溘已隔重泉不作鵬搏海翻成鶴上天  
談經溪閣月對酒竹樓烟回首東山社傷心憶往年  
又

連年家難劇雙淚日沾纓已嘆無兄弟誰堪喪友生  
延陵荒草合管子舊臺傾更甚山陽路空聞笛裏聲



穀城山館詩集卷九目錄

五言律詩

泰山道中

上隔馬嶺舊寺

泰山天門禪堂逢傅柱史金沙贈別

泰山絕頂對酒  
下泰山遊三陽觀

飲三陽觀絕頂對月

遊仙詞四首贈三陽觀督雲山道士

子冲携尊方山相候因謀卜築

靈巖竹房對雨

靈巖王僧邀遊五峰亭遇雨卽事

靈巖禪室子冲興甫夜飲大醉

買洪範泉旁隙地規作園池

夏日黃石山莊卽事

夏日山居周礪齋太史奉使周藩過邑見訪賦

贈二首

因周太史使還海上寄楊鍊菴丈及澄上人一

首

午日獨酌

山莊獨居

聞胡竺二西山人被繫有懷二首

十月四日張就山初至同飲東園菊花下作

安我素吏部倚舟過訪酬贈

冬夜宿香山寺

暮抵吳家渡楊令君携酒宿王戶部別業住弔

于子冲黃家渡口大雪

雪中濟南道上携張就山同行忽失所在詩以

覓之

張山人告行燈下言別

送張就山西遊趙國及赴蕭大司馬之召

查虞臯儀部道出濟上遣書賜問賦荅二首

壬辰冬月連營兄弟二墓撫今追昔潸然有感

聊賦四首

石門道中

再過汶上路鳳岡民部出送河橋畱別

任城魏松軒山人携琴見過從遊溪山數日書

贈

南溪石上聽魏山人彈琴送別

吳門周畫師從遊溪上數日賦贈

秋日從諸親友飲城南溪上遇雨呈亭山周師

二首

六月十二夜可大小酌卽事

七夕可大小會卽事和韻

和可大七夕書懷

江右黃淮胸文學可大客也以書授其弟姪東

遊賦贈

陪朱可大丈遊陶山幽棲寺絕頂同張士師李

鴻臚黃文學賦

陶山懷古

陶山贈張東山士師

遊雲臺山

同可大宿黃山張氏精舍

同可大對飲黃山玉龍峽上

泰山客館送朱可大登嶽

重遊三陽觀宿

三陽觀木末亭晚眺因遲可大未至

傲來山

同諸君飲竹林寺樹下

觀泰山百丈崖瀑布

望仙影巖

西汀臨汎呈印泉舅氏二首

乙未十月傅金沙侍御殷洗心舍人過訪山中

賦贈

冬初傅金沙侍御過訪因韻賦和

秋日閑居有懷黃大宗伯

山中寄徐少宰丈

穀城山館詩集卷九

東阿于慎行著

門人邢侗校

門人郭應寵編

五言律詩

泰山道中

地僻塵踪少  
山深石路斜  
雨中過佛院  
雲裏見人家  
雉雉飛春麥  
啼鶯繞落花  
流亡今欲盡  
幾處有桑麻

上隔馬嶺舊寺

荒涼經古寺迢遞出層空路抱千峰轉天開一竇通  
殘松疎雨後頽瓦夕陽中猶有餘僧在逢迎問轉蓬

泰山天門禪堂逢傅柱史金沙贈別

含桃花欲落山下遇君時雨過空王殿天晴嶽帝祠  
相看芳杜色各有白雲期不似風塵路惚惚嘆別離

泰山絕頂對酒

茫茫今古事欲問岱君靈漢栢虛稱觀秦松枉勒銘  
此生遊已倦何地酒能醒杖底千峰色依然未了青

下泰山遊三陽觀

半嶺通仙界縈迴嶽麓西已看三觀迴猶覺萬峰低  
暮雨瑤華落春雲玉洞迷遊情渾未減縹緲望丹梯

飲三陽觀絕頂對月

孤亭堪倚嘯一醉斗牛邊爽拍千峰月鷓飛萬樹烟  
花前鸞吹度海上鶴書傳借問三宮路今當幾洞天

遊仙詞四首贈三陽觀省雲山道士

寰區不足步聊作小遊仙牒秘丹繒字山藏綠玉篇  
石梁雲外掛瑤島月中懸欲問餐桃客蓬萊更幾千

其二

五遊凌碧落彷彿見乘鸞  
瑤水銀爲闕蓬丘玉作壇  
飛塵成大藥毀竈出神丹  
舊遇華山博曾將六箸看

外伯公曾棲  
華山故云

其三

由來稱福地自合有仙才  
蕭史吹笙下樂巴  
噀酒迴雲軒通紫闕  
月宇逼丹臺  
謝手塵中客  
年光漫自頽

其四

辭家慕冲舉名嶽且依棲  
遼左遲歸鶴淮南見去雞  
玄霜堪入藥白石總如泥  
試訪清都宴雲間路欲迷

子冲携尊方山相候因謀卜築

百里行厨至追歡有報書  
春城開臘蟻別墅罩河魚  
白社能留客青山可卜居  
未須煩地主十笏是吾廬

靈巖竹房對雨

舊日題名處山牕竹未殘  
重遊春欲暮復向雨中看  
暝色來千嶂寒聲到萬竿  
應添禪悅味新笋入盤餐  
靈巖主僧邀遊五峰亭遇雨卽事

已成三日醉更上五峰亭  
嶺外雲猶碧尊前雨乍青  
唯然南嶽偈莞爾北山銘  
向夕傳清梵泠泠不可聽

靈巖禪室子冲興甫夜飲大醉

斗酒不能醉明星已在天放歌知愛客縱飲是逃禪  
世事驚心後時才屈指邊乾坤吾黨在把臂意茫然  
買洪範泉旁隙地規作園池

誰言泉上築不作輞川看山色宜書幌溪陰可釣竿  
分流防短岸樊圃避危湍稍待西疇畢移家事未難

夏日黃石山莊卽事

山居涉長日散髮不容簪酒熟牀頭漉詩成枕上吟  
移花常待雨種樹稍成陰欲叩金閨侶何如此陸沉

夏日山居周礪齋大史奉使周藩過邑見訪賦

贈二首

念君遠行役六月過山城細雨鐘前落微風樹杪生  
茶瓜涼夜色車馬故交情却憶橫門道分携歲已更

又

負郭門常掩何因駐使車時同河朔飲地似武陵漁  
天地容高枕烟霞有定居莫將竒字問獨少著成書  
因周太史使還海上寄楊鍊菴丈及澄上人一

首



苦憶東林侶逢人附報書花殘陶令宅月出遠公廬  
世念歸應盡幽懷病未疎三山知有路正擬戒遊車

午日獨酌

邑里逢佳節無歡坐草亭年華雙鬢白心事一盃青  
柳畔驚鷓鴣花前嘆鵲鴿少人與同醉不是獨爲醒

山莊獨居

豈無山水慕只是舊遊孤隴上遭田父壚邊問酒徒  
頽年資藥餌野性適江湖回首鷓鴣行地春風滿鷓鴣  
聞胡竺二西山人被縶有懷二首

伉慨關東俠詞場舊所歡如何燕市筑忽作楚臣冠  
翻覆人情險傾危世路難夜來豐獄劔虹色爲君看

又

長鋏今何適從軍赴桂林談天時網密逐客廟謨深  
寥落詞人賦淒涼國士心沅湘何處望愁絕鴈書沉  
十月四日張就山初至同飲東園菊花下作

上客來何暮山齋菊欲殘猶餘秋徑色聊待酒人歡  
艷蕊迎霜立寒香浥露餐晚酣休便去新月出林端  
安我素吏部倚舟過訪酬贈

沙邊能繫纜相顧到林廬斗室虛高枕衡門有駐車  
挑燈秋雨後漉酒菊花初好在山公啟休忘北闕書  
冬夜宿香山寺

一宿招提境匡牀坐夜分山深遲見月石冷細生雲  
仙梵林中發名香座上焚老僧應出定時覺語相聞  
暮抵吳家渡楊令君携酒宿王戶部別業

十月荒山道迷茫起暮陰淒風吹古渡寒霧結平林  
地主尊壘遠山家巷路深因過故人宅懷舊一悲吟  
往弔于子冲黃家渡口大雪

寒冬涉濟水雨雪滿征表欲解留徐劍猶疑訪戴舟  
馬蹄臨渡澁人跡過山稠漸近齊州路傷心觸舊遊  
雪中濟南道上携張就山同行忽失所在詩以  
覓之

雨雪携同好行行失所如細尋東廓履久駐信陵車  
誤恐迷花徑寒應殢酒廬居然成間濶暝色野躊躕  
張山人告行燈下言別

幽居無與晤殊喜故人來秉燭頻開卷逢花數舉盃  
寒雲江上樹凍雪隴頭梅明發黃山路離愁不可裁

送張就山西遊趙國及赴蕭大司馬之召

關河水雪滿遊子去何之長揖雲中幕高談鄴下詩  
西園飛蓋夜北塞勒銘時回首秋山賞能忘桂樹枝  
查虞臯儀部道出濟上遣書賜問賦荅二首

別緒三秋迥書來慰夢思林中醒酒後河畔倚舟時  
雪靜關山影雲生澗壑婆歲寒無可贈惟有折松枝

又

有懷江左彥夙昔共蘭襟報國青萍器承家玉樹林  
郎曹雙管舊禁漏五雲深無恙西山色猶堪拄笏吟

壬辰冬月連營兄弟二墓撫今追昔潛然有感

聊賦四首

無限傷心地連朝薤露吟仁兄歸永夜愛弟托荒岑  
華萼俱凋落松楸漸鬱森寸腸摧斷久猶自涕沾襟

其二

累歲遭家難心悲不可論魯門疑遠夢易水送歸魂  
取次栽墳樹從新拭淚痕乞休曾有疏酸惻動天閭

其三

門庭思徃日文雅盛當時共目三珠樹相輝五桂枝

一朝虛枕被萬事罷埴筦怙悵餘生在衰顏欲對誰  
其四

久客歸何倚孤蹤只自憐顧瞻鴻鴈影吟嘆鶴鴒篇  
翰墨藏春雨池塘慘暮烟經過酬倡地無處不潸然  
石門道中

風雨石門道淒淒衣袖單人家烟樹隔山徑草花寒  
蕭索前朝寺荒蕪何代壇十年來往路立馬一長嘆  
再過汶上路鳳岡民部出送河橋留別

邑里經年別重逢春草芳一盃臨汶水三月縮垂楊  
豪俠齊公子風流漢省郎鄉山多勝賞後會莫相忘  
任城魏松軒山人携琴見過從遊溪山數日書

贈

自遣樊中累常多物外遊看君携綠綺訪我到滄洲  
月色和烟映泉聲作雨流吾廬山水際是處可淹留  
南溪石上聽魏山人彈琴送別

溪樹午蕭森因君理素琴乍將流水引寫作落霞吟  
別鶴飛何遠遊魚躍自深只今懷往路何處覓知音  
吳門周畫師從遊溪上數日賦贈

林壑看如畫幽人此地過彈琴流水近對酒暮雲多  
地僻無來往山深足嘯歌牀頭有匹練試爲掃烟蘿

秋日從諸親友飲城南溪上遇雨呈亭山周師

二首

雨後南溪水新添幾尺流壺觴陪父老笑語到林丘  
掃石聊施簞烹魚旋摘釣酒闌更坐起隨意看鳧鷗

又

濶略師生禮相將把釣竿青山閑共適白髮醉同歡  
雨色尊前近灘聲樹杪寒踏泥連騎緩歸路不知難

六月十二夜可大小酌卽事

客乘殘雨至席對晚涼開酒畔移燈去花間送月來  
風流河朔會倡和栢梁才更憶長楊路青葱玉樹栽

時乃郎試  
京兆云

七夕可大小會卽事和韻

小閣驅殘暑當筵夜色青樓頭生片月河畔度雙星  
桃葉虛稱扇松枝戲作屏秋聲驚白紵沉醉不能聽

和可大七夕書懷

新涼浮玉宇客館易爲愁天上明河夜人間白露秋

逃名惟對酒乞巧詎登樓自有豐城氣迢迢映斗牛  
江右黃淮胸文學可大客也以書授其弟姪東

遊賦贈

南州有高士邂逅見風流雅醉荆卿酒常隨郭泰舟  
窮經探魯壁作客佩吳鉤門下推師授名成兩夏侯  
陪朱可大丈遊陶山幽棲寺絕頂同張士師李

鴻臚黃文學賦

幽棲真此地絕壁到人稀石角斜鉤杖藤稍曲絳衣  
壺餐高洞險鐘磬下方微共有登臨興誰能不醉歸

陶山懷古

越相何年隱齊山舊有名地連肥子國路出鑄鄉城  
洞杳秋雲白巖深古木平臨池懷往跡頗識種魚情

陶山贈張東山士師

陶朱今不見君是魯朱家俠骨千金劍仙鑪五色霞  
生涯隨畜牧鄉語話桑麻早結東山隱驚看鬢有華

遊雲臺山

窈窕黃山路秋雲入幾重寒聲泉上竹古色寺前松  
地隱秦時洞天連越觀峰由來真跡秘不許世人逢

新坡山館詩集 卷九  
同可大宿黃山張氏精舍

谷口隔疎籬林深鳥不啼石泉縈戶轉山果亞枝低  
礧壑參差映藤蘿只尺迷苦無向平累倘可共依棲  
同可大對飲黃山玉龍峽上

看山意不厭復此濯塵纓澗落飛虹影泉飄噴玉聲  
隔花分送酒鑿石共題名相對濠梁意翛然少世情  
泰山客館送朱可大登嶽

息駕泰山麓何以慰所思送君九節杖拄上五松枝  
澗底出雲處夜中觀海時同遊不同醉應憶舊題詩

重遊三陽觀宿

曾向春山宿重來似舊青壇風落橡栗巖雨長芝苓  
試覓長生藥聊緡內景經不知涼夜永星斗掛疎櫺  
三陽觀木末亭晚眺因遲可大未至

木末堪凭檻秋空四望開晚烟迷汶水落日滿徂徠  
酒憶壚頭醉人從嶽頂廻那逢搖落候蕭瑟易悲來  
傲來山

不斷青螺色依然萬仞峰雲間翔鶯鸞天杪秀芙蓉  
嶽界三千里仙閣十二重神功何處歛此地宅蛟龍

崇城山食言集 卷九  
山有芙蓉飛鴉諸峯  
山下石窟名曰龍池

同諸君飲竹林寺樹下

靈嶽多真境禪宮路更深五峰常隱日雙樹自成林  
涉澗逢瑤草臨流漱玉琴晚鐘歸騎緩沉醉北山岑  
寺在泰山山下陞

觀泰山百丈崖瀑布

盡日水聲中還看匹練空盤渦喧萬馬削壁鬪雙虹  
派挾天河落源從月窟通固知靈境異融結駭神工

望仙影岩

泰山山西峰石壁有仙人影側身東向

何劫飛來影分明鶴上仙側身疑面壁作禮似朝天  
觀化興雲雨憑虛閱歲年扶桑終日在幾見海成田

西汀臨汎呈印泉舅氏二首

秋水寒塘淨蘭橈別渚通林端懸片雨蘋末起微風  
孤嶼浮波外長天一棹中漁竿堪自老不是慕非熊

又

西汀懷舊隱秋杪片帆來落照尊前樹寒烟水上臺  
舟移明鏡轉雲盡畫屏開笑語淹吾舅浮槎夜未廻  
乙未十月傅金沙侍御殷洗心舍人過訪山中



賦贈

命駕何相值開尊夜向闌風高邊鴈盡霜冷菊花寒  
天地吾徒在江湖此會難占星應有地總傍少微看  
冬初傅金沙侍御過訪因韻賦和

百里寒山道勞君問隱居玄言聆喻馬往事笑焚魚  
嶽色青尊外秋聲白苧餘良遊知不厭卜築意何如

秋日閑居有懷黃大宗伯

望望溫陵道含情憶舊遊夢迷明月夜人老白蘋秋  
海濶休看鴈山深自倚樓何時江路柳重見木蘭舟

山中寄徐少宰丈

笑濶同心侶多年嘆索居吳門遙繫馬魯國久懸輿  
歲晚憐交態天長闕報書悠悠清汶水一為覓雙魚

山館詩集  
卷九



*Faint handwritten text or a signature, possibly in cursive, located in the upper left quadrant of the page.*

